



TAPAK 7

Akshay National Award
angutsü tetemsü



TAPAK 9

Asür sepai kibongtem den linük
nübortem lir: Kiren Rijiju

VOL. XIV NO. 193 (ADOK 193)

DIMAPUR

WEDNESDAY

MAY 03, 2017

5.00

Mokokchung nung Moatsü benjung kanga mera keta mungogo



Noksa nung (abelen) Dr Shurhodelie nem senpetsüdang aser (achiji) Akolongshi teloki sobaliba sayasapong ka aiba angur.



Mokokchung, May 2 (TYO): Ao Sendeni Moatsü benjong sentong tulu ka yangi Mokokchung Imkongmeren Sports Complex nung ayongzüka mungogo. Iba sentong nung Ao senso sangertem den Angami Public Organization (APO) nungi nübu meyirijang dak tema arua benjong kanga longsodaktsü.

Tanü iba sentong nung Ao Senden kübok tzikong balala den Psalmodic Ensemble, Salokum Roko Ungma aser Angami Public Organization

(APO) kübok Northern, Southern aser Western nungi telok balalai akhi tsurabur yimya nung sobusolem akhümketa sobur yar tsüngsang aser sobaliba kentenmenü tapu balala ia shilem tajung agia tesentepertem kanga benjongtepogo.

Iba sentong nung tongti tesemdang Nagaland Chief Minister Dr. Shurhodelie Leizeitsü-i jembidang, Nagaland ya benjongbentsü lima ka lir, kin balalai mongpu shia nung

benjong balala amunger. Anungji, benjong ya longsotepa aser chiyungtepba mapang ka dang masü saka ibai asen sobaliba nela ka lir, ta metetdaktsü.

Benjongbentsü ya rizünga ayuba mapang ka dang masü saka ibai asen sobaliba wazüka ayuba maparen ka lir, anungji, Naga nunger lokti asoshi benjongbentsüji kanga tongtibang lir. Aji oda, asenoki ibai tajunglen tamshi shia amshitsüla, ta pai tayongzüka ka agütsü.

"Ao kinji tia takatiba nübortem

lir, Ao kinji lenla aika nung samanir asünung, Naga nübörongnunga tedi tambusang ka ama inyaktsü onoki nenok nungi imlar. Iba khuretji lanu putu nema angatetdaktsütsüla", ta pai ayongzü. "Kodang nai tedi tambusang ama inyakdir, tangartemi nenok dak rangloktsü aser iba tsüngsü nung jajatsü", ta paisa ashi.

"Tanü asenok ya aso 21 buba nung alir. Nisungchi ama asenoki bilemer, ibaji atangji süra, asen lima ajungtsü atema nisungchi ka

ama asenok ajaki tajungtiba inyakdi", ta pai ayongzü. "Naga nunger ya talangka shiranger, iba tebilemtsü ya tarutsü putu nem mebenloktsütsüla. Tang koba Naga yimden tebilemtsü lir, ibai ajaki agizüktettsüsa aser teti asoshi telatetba dangi arutsü ajaki tajungtiba agi shilem agitsüla", ta paisa inyakdaktstünüba olen ka ashi.

"Asenok ya tejakleni aor ama bilemer, saka khenkhenbo asenok ya kechi jenjang nung lir ta aroka bushisüngdangtsüla aser süoki ia bilemdangtsüla", ta ashi. Kin anasangeri iba ya tetenzüker ka südaktsür yimjung aser temeim osangji tanüngba nübortem dangi peroktsü asoshi paisa ayongzüka liasü.

Tetushi tejaoker APO tir Dr. Vilhusa Seleyi-i mapang tatsüka agia jembidang, Angami nunger ajak tenung nung Moatsü salem lemsatepba den Ao kini sentong tajung yanglur parnok jaokba asoshi mezüngbuba pelaba metetdaktsü.

(Maneni tapak 11 nung...)

Ao Senden aser APO tsüngda onük kar renem

Mokokchung, May 2 (TYO): Ao Senden (AS)-i Angami Public Organization (APO) jaoka 2017 Moatsü benjong amungba temaitsü kin ana telungjemi mulungtepa onük kar renema yuogo.

Onük renemba rongnung mezüngbubaji; 'Onoki Naga nunger songjen asoshi yimjung, tesünep aser telungjem asoshi inyaktsü,' ta Ao Senden o APO nati metetdaktsü.

Tanabuba nung, "Naga nunger telungjem asoshi kin ajak ajurua jembitsü aser asenok dak aketba tashimait shisatsü ajak endoker, pei dang meimba ama kiyonger dang meimtsü ashiba tanüla aser tangtetba nung Naga nunger tarutsü asoshi inyaktsü," ta parnokisa metetdaktsü.

Tasembuba nung, "Naga nunger yirua aliba aneptsü aser

renloka aotsü asoshi nüngdak tulutibaji telungjem asütsü," ta AS aser APO natisa tangatetba ka metetdaktsü.

Pezübuba nung; Naga nunger ya ka dang, aser pei nisung rongnung yimjung apu alatsübaji mezüngbuba tongtibang mera ka asütsü, iba ama mapa ajanga dang Nagaland nung teti atema yimjung bener arutettsü, ta parnokisa ashi.

Pungububa nung; Naga yimten tensa tia ya temangmangtsüka kümogo, anungji Naga nunger kin ajaki iba tebilemtsü koktettsü asoshi shisatsü bendena akok tashi yariteptsüla ta Ao aser Angami nunger lenirtemi metetdaktsü.

Iba benjong amongba ya ajanga Aor o Angami nunger na dang masü saka Naga nunger ajak lungjemdaktsür ta parnokisa metetdaktsü.

Nagaland nung ITI tasen 4 amenoktsü

New Delhi, May 02 (Agencies): Tanü Minister of State (I/C), Skill Development & Entrepreneurship, Rajiv Pratap Rudy-i Department of Treasuries & Accounts, Relief & Rehabilitation, Government of Nagaland Advisor, Dr. T.M. Lotha ajurua "Enhancing Skill Development Infrastructure in NE States & Sikkim" scheme aser skill development mission kübok scheme balala ajanga Nagaland nung terenlok mapa inyakba indang o lemtepa liasü.

Tenatisa Nagaland nung skill development institutions amenoktsü atema state koba jenjang ka nung lir, iba atemaji asadanga o lemtepogo.

Nagaland nung ITI ana upgradation kübok lir aser ITI pongu Supplementing Deficient Infrastructure kübok lir, aser iba atemaji sen lakh 1149.47 lemzüksüogo. Iba scheme kübok aliba ITI anaji Dimapur aser Peren na lir.

(Maneni tapak 12 nung...)

Moatsü ajanga arrtsü nung nübortem tesentaktep akangshir



Tsuremnen Yim Moatsümong nung tongti tesemdang Wb. Temsu Jamir (abelen) aser Mogroigaon yimtsürtemi Bihu tsüngsangdang Tsuremnen watsülartemi külemi tsüngsangba angur.



Dimapur, May 2 (TYO): Küm shia May 1 nü Mokokchung district kübok Assam den arrtsüa aliba Tsuremen yim nung Moatsü benjung amunger aser iba benjungmung nung arrtsü adena orr alirtem den tesentaktep aser telungjem tali akangshir.

Taküma kasa anogo nung Tsuremnen Yim Moatsümong sentong ayonga amung aser iba nung tongti tesemdangjeri Joint Director of Food & Civil Supply Department, Nagaland, Temsu Jamir liasü.

Küm shia yimya ka ama Jorhat, Assam nung Titabor subdivision kübok aliba Mogroigaon yimertemi Tsuremnen Yim Moatsümong nung shilem agir aser parnok GB (goanbura)-i anir benjung nung yartsüngsang ajanga shilem agir aser iba sülen saisapong den chiyungba nung adener.

Yashi ayonga amungba

benjung nunga Mogroigaon lanurtemi Bihu dance ai aser GB Taisenmong Raj Kumar-i o tatsüka jembi.

Taisenmong-i o jembidang, telok ana tsüngda yimjung aser putepa alitsü atema mapa inyaktsübaji pa indang teinyaktsü lir, ta ashi.

"Tesüiba mapang tangar kari telok ana tsüngda mepetmesü adokdaktsütsü atema meinprongogo. Nisung shinga nema Naga aser Assam nunger tsüngda telongjem raksatsü atema mapa meinyakdaktstüsü" ta paisa shisem.

Taküm benjungmung nung Assam nungi local Television channel tem arua shilem agi aser parnok Moatsü benjung indang sentong live sayu.

Sentong nungsa Titabor SDPO, Gayatri Sonowal aser Mariani OC naprong aden.

Temsu Jamir-i tongti

tesemdang o jembidang, yimdaklirtemi clean election 2018 atema mapa inyaktsü atema ayongzü. "Tangbo, asenoki candidate tem ket nungi sen meshia magili saka nübortem asoshi mapa inyaktsüba candidate tajung ka shimdi" ta pai ashi.

Tsuremen Moatsü sentong nung mendenji Watitemjen, Teacher GMS Tsuremnen liasü, Wb L Imnuk Longchar-i Moatsü ratet jembi, Wb S Meren Ao, Deputy Manager (Project) NHHDC Ltd Dimapur aser Wb N Nungsang Longkumer ret Teacher nati tepela o jembi aser Wt MAsola, Associate Pastor Women-i tenüngsang agüja sarasadem.

Yashi Mogroigaon yimertemi Moatsü benjung nung shilem agi aser sangküm January ita Tsuremen yimertemia Mogroigaon-i oa idakji Magh Bihu benjung nung shilem agitsü.

Mongsenyimti Senso Kohima Union Golden Jubilee amung



May 02, 2017 nü Molu Ki, Kohima nung Mongsenyimti Senso Kohima Union (MSKU) küm 50 ajungba Jubilee benjung sentong nung Vigilance & Anti Corruption Nagaland Director, I. Meyionen Jamir, Chief Engineer P. Lanu Aier aser tangartem tangokba noksa nung angur.

Kohima, May 02 (TYO): May 02, 2017 nü Molu Ki, Merhulietsa, Kohima nung Mongsenyimti Senso Kohima Union (MSKU) küm 50 ajungba Golden Jubilee benjungmung sentong "Towarutem" omen nung ajemdaker mungogo, aser iba sentong nung tongti o jembirji, Vigilance & Anti Corruption Nagaland Director, I. Meyionen Jamir liasü.

Sentong nung Police Engineering Project Chief Engineer, P. Lanu Aier-i souvenir kaket 'Towarutem' sayatsü.

Onük jembidang Meyionen Jamir-i, MSUK küm 50 ajungba benjung 'Towarutem' omen nung ajemdaker amungbaji kanga tapet, ta metetdaksü.

'Towarutem' olong teratet tongmelang agi, iba ya lokti aser alima ajungtsü atema inyakba mapang ka lir, ta pai ashi.

Paisa, iba ya taküm nung nisung ka kanga taginütsü mapang ka lir, kong nisung kati shisatsü peria ngur, taküm nung shisatsü aika ngur, aika ajangshir, senotsü nung yangerteter, tensa balala aika ajangshir aser tebilemtsü onük ajak

koktettsüsa temelung lemteta aliba mapang ka, ta ashi.

Pai ashiba agi, lokti ka mesüra nija ka küm 50 ajungbaji, abensar ta ashitsü akok. "Züngya 50 ajanga tain akumba, tashi aketba aser taküm nung tabensa akumba sayur," ta paisa ashi.

Iba ya peisasa bushidanga asadangtsü mapang ka, aser lokti ajungtsü atema mangdang tasen ayutsü mapang ka lir, ta pai metetdaksü.

"Küm 50 abensar asünungji, asenok ya asen temeket nung atalalokbatem repranga dang atatsü mapang ka masü, saka temelenshi atema inyakertem asütsüla iba den külemi asen putu aser tarutsü putu ajungtsü atema inyakertem asütsüla," ta pai ayongzük.

Ano Lanu Aier-ia, "Union tem ya nukjidong tajung yur tentetbatem lir, aser MSKU-i anema-alibaren, shisaliok aser mission mapatem nung lokti atema mapang tajung aika inyakogo," ta metetdaksü.

Paisa, mapa manguba tebilemtsü bentettsü asoshi infrastructure nungdaker, aser ibaji asen lima nung

yimjung aliba ajanga dang ataloktsü, ta ashi.

Nija sector temi sorkar sector tem ajangetdar, ta shia pai lokti dang tarutsü nung skills development dak sendakba nung sentongtem ayongzüka katsütsü, aser ibaji ajanga lanurtem ajangzükdaksütsü ajungshi.

Kasa sentong nung Langpangkong Senso Telongjem Kohima, Village Council Mongsenyimti aser Mongsenyimti Senso Bendang Union nungi züngsemtem den Dr. SI Tushi Ao-ia jembia liasü.

Iba sentong ya MSKU office ketdangpurtem leniba nung agi aser KABA Pastor, Rev. A. Chuba Jamir-i sarasadema liasü.

KMSST Convenor, Iminungla Longkumer leniba nung Union nung asürtem bilemteta teloki ola madoki asürtem nem akhüm agüja liasü.

Kasa sentong nung Zulutila Pongen-i ken ka aten aser Planning Committee Convenor, M. N. Ajungba Ozukum-i tepela anküp o jembia liasü. Iba sentong tembangba sülen asayamenü sentong liasü aser Jubilee mung chiyungtep.

Technical service training sangdong

Dimapur, May 02 (TYO): Administrative Training Institute, Nagaland, Kohima-i tang mezüng May 4 nungi 6 nü tashi Technical Services (Engineers & Medical Doctors) atema Induction Training Programme ayonga katsütsü, aser iba training tetenzük sentong nung tetushi tejaokerji Nagaland Chief Secretary asütsü, ta ketdangsertem osang

ka ajanga metetdaksü.

Iba training tetenzük sentong nung concerned AHODs aser HODs ajak arua adentsü, mepishia metetdaksür, ta kasa osang ajanga metetdaksü.

Iba dak alia traning nung shilem agitsüpurtem danga, May 4, 2017 anepdang 9:00 ako matongdangsa ATI tonga arutsü metetdaksür, ta kasa sangdong nung shia lir.

ATMA Kohima indang kaket ka saya

Kohima, May 02 (TYO): Tanü Jakhama Village nung ATMA Kohima district-i adokba kaket "Documentation on Zabo Farming" Agriculture & SNO (ATMA) Director, Helie Rupreo-i sayatsüogo.

nung adener Farmers' friends (FF) tem dang Nagaland nung aluyimba nungi züsentetba osang metetdakja liasü.

Iba sentong tembangba sülen Farmers' friends (FF) atema orientation programme ka

Iba sentong nung Director-i ATMA team nem parnok mapa tajung atema tenüngsang agütsüba den külemi sentong

katsü. Iba sentong ya Vizonyu Liezie, DAO & PD (ATMA), Kohima leniba nung agi aser sentong nung FFs 32 dena liasü.

AR-i Impur Junction nung yi aika apu



Dimapur, May 02 (TYO): Osang tejangja ka lazükba sülen HQ IGAR (North) kübok 44 Assam Rifles-i April 28, 2017 nü Mokochung district kübok Impur Junction nung garitem mita liasü, aser iba mapang nung Hyundai Santro Xing gari registration number NL07 3205 mita reprangdang sen 90,000 shi

jenjang MC dowell Rum pongdang 197 den can beer 52 puogo, ta tanü Lt Col Amitabh Shrama PRO, HQ IGAR (North)-i Assam Rifles sangdong ka nung metetdaksü.

Iba gari anisang den passenger ji pua parnok ket nung aliba yi densema police ket nung agütsüogo, ta kasa sangdong nungsa shia lir.

Diphubar nung Aoertemi Moatsü benjungmung kanga meraketa mungogo



Diphubar (Dimapur), May 02, 2017: Mongolbarnü Diphubar nung Aotsür-Aoertem Moatsü benjungmung sentong nung Ao Youth Front Diphubar teloki yar tsüngsangba tiyongtsü noksa nung angur. Abelen noksa nung Limasunep aser ajichilen noksa nung SI Jamir nata angur.

Dimapur, May 02 (TYO): Tanü May 02, 2017 nü Diphubar nung aliba Aoertem tanur-tain ajak sobaliba sobotsü kanga meraketa sobur Diphubar local ground nung adenshia Moatsü benjung kanga longsoa mungogo.

Iba benjungmung ya Ao Senso Telongjem Diphubar (ASTD)-i "Envisioning today's cultural values for tomorrow" (Asüng nukla nung tanü sobaliba jenjang) omen nung ayongzüka among.

Iba sentong nung tetushi tejaoker rongnung Urban Development Advisor, SI Jamir aser Commissioner of Police, Dimapur, Limasunep Jamir (IPS) na densema liasü.

Sentong nung jembidang SI Jamir-i lokti dang, talisa lanurtem dang, asen sobaliba aser yimyatsüyatem wazüka ayutsüla aser ajungkettsütsüla, ta ajangshia liasü.

Ano Commissioner of Police, Limasunep Jamir-ia, Aoeri Moatsü benjungmung

ya lokti nung azükaru aser yimchiyimjung nukjidong yur amunger, ta metetdaksü.

"Anüng kübok ajak atema mapang ka lir aser mapa ajak atema tsüngkem ka lir. Taküm küm tetenzüklen Diphubar nung tejashi aser tesama liasü, saka tanübo iba ya benjungtepba mapang ka lir. Tsüngrem den tesünep yanglutsü miim oji, Tsüngremer mapang tetemsü agizükettsüla aser iba nungji pelatsüla ta asenoki Laishiba

nungi angateter," ta paisa metetdaksü.

Police ketdangser ka ama, yimjung aser telongjem atema inyaksü ayongzük aser amalitepa inyakba ajanga asenoki district tejakleni bener aotsü, ta paisa ashi.

"Atangji iba ya temoatsüba anogo ka lir, kong adianu temeimtep, taitoktep aser ka kuma longjemba tanela nung Moatsü benjungtsü atema asenok ajak longjemogo," ta paisa shisem.

Kasa sentong nung N Tsuknung Jamir-i Moatsü teratet lemsatep aser Diphubar Village Council Chairman, Lanutoshi Pongen-ia o tatsüka jembia liasü.

Iba sentong nungsa Ao Senso Telongjem Diphubar Tir-i lokti pelaa agizüka liasü.

Diphubar Watsu Telongjem, Diphubar Aor Obalatem, Ao Kaketshir Telongjem Diphubar aser Ao Youth Front Diphubar teloktemia shilem balala agia liasü.



Itanagar, May 02 : Arunachal Pradesh Chief Minister Pema Khandu-i Arunachal Pradesh Legislative Assembly building tasenba semdang dang tangokba noksa nung angur.

Sen taila bener nisung ana Meghalaya nung apu

Shillong, May 2 (Agencies): West Garo Hills district nung sen taila bener nisung ana apuba osang police-i metetdaksü. Dena ket nung taila sen lakh 1.32 ngutet.

Ozüng alema inyakba nisungtemi yimtsüng nung shishilemba dang sen taila amshiba osang tejangja ka angazükba sülen police-i meita aoba nung iba nisungba ana ya apu.

"Onoki ozüng alema maparen balala inyakba nung tongtiba ana puogo aser tang par telok nung densema aliba nisungtem bushisüngdangdar,"

ta district police chief M G R Kumar-i ashi.

Pai ashiba agi, ozüng alema inyakertemi yimtsüng nung kozü aser tanga osettem ali-i arur aser parnokni nikoktsütsü tamang tesemtem nung dang item oset aliba sentem agütsür.

"Yimdaklirtemi tamang nung sen taila asü masüar majiteter, aji dang masü sen tailatem shidak mesüka yanglur aliba ajanga majiteti parnok jenbur," ta Kumar-i ashi.

"Item ozüng alema inyakba nisungtem India nung sen taila proktsü asoshi tanga linük den sendaktepa lir ta bilemer. Item

sen tailatem joko mapang tatsüka Mankachar ajanga Bangladesh nungi belener. Item taila sentem bendangtsü asoshi kanga tasak lir, kechiyong nüpkokertem atema '3D raised elevation' features inoka alibatem amalaa densema yanglua lir. Parnoki item sen tem prokshitsü asoshi nisung kanga longsua aliba shishilembadak inyaker," ta SP-isa ashi.

Police-i nisung ana pua aliba ya Assam kübok Hazirhat tesem nungi Abdul Kalam aser Tura nung alir Salseng Sangma, ta jangjaogo.

Sonitpur district nung NDFB telok atsükba tesem amak

Guwahati, May 02 (Agencies): Assam nung aliba Sonitpur district nung National Democratic Front of Bodoland (NDFB) telok tashi itshitsü sentong renema aliba raksatsüogo. Paharpur tesem nung aliba arem min nung NDFB telokba tesem ya Gajraj Corps, Assam police aser COBRA Battalion ajanga April 30 nung makdok.

Itangiter temi NDFB telok aliba osang agütsüba sülen Gajraj Corps, Assam police aser COBRA Battalion longjemer Assam aser Arunachal Pradesh arrtsü nung aliba Paharpur min nung April 29 anepdang yakta mita bushi tenzük.

Iba sülen tasüng parnokni NDFB telok atükshia kazüba tesem nguteta amak. Arem min onsara tulu asüba ajanga NDFB purtem jena oadok. Parnoki rifle ana, pistol ka, injang 50 aser grenade ka tena

prangpong aser injang aika den raradang amshiba oset aika toktsür jena ao.

NDFB indang 3rd Battalion ya Sonitpur district nung kanga yakyakshiyaka lir ta osang angazüker. NDFB telungpurtem ya Assam aser Arunachal Pradesh arrtsülen lir aser parnokni ozüng alema tashiyimagi sen meshiba mapa tamajung inyaker.

"NDFB pur atsükshiba tesem maktetba ajanga parnok tashi itshitsü aser kükümshitsü sentongtem raksatsür," ta osang ka ajanga ashi.

Anu maneni osang tejangja angashiba sülen Gajraj Corps kübok Red Hornet Division aser Baksa Police longjemer April 30 nü mita bushiba mapang NDFB den sendaktepa alir nisung ka apu aser pa ket nungi AK-56 Rifle ana, linük nung yangluba rifle ana, 9mm pistol ana aser injang aika ngutet.

Assam, Baksa district nung alir arishi küm 33 tain, Nirmal Basumatary-a Simla anasa Bongaon yimtsüng nung apu aser pa ket nungi Gazimara rifle ka aser injang 12 ngutet.

Nirmal Basumatary-i ashiba nung ajemdaker Darrangamela nung alir Ranjan Boro aser Sntala Boro'er ki mita bushiba mapang AK-56 rifle ana den magazine pezü aser injang 10, country made rifle ka, 9mm pistol ana den magazine pezü aser injang 48, 0.303 injang ka aser 7.62mm injang ka ngutet.

Ranjan Boro aser pa kinungtsü ya tang tashi monguteti bushiba mapang lir.

Parnok ajak YA NDFB den sendaktepa aliba kisung masü, saka tashiyim agi sen meshiba aser BTAD & MAnas Reserve Forest nung ozüng alema shiruru akhaba nung dena lir südi, ta temolung malemba osang ka ketdangsertemi metetdaksü.

Assam nung lisopur shilem 90 ket nung ali patta mali

Guwahati, May 2 (Agencies): Taoba chief election commissioner Hari Shankar Brahma lenisüba kübok lisopur li kümzüka ayutsü asoshi state-i senotsü teyari agütsüa kümteba committee ajanga asadangtetba agi, Assam nung lisopur 90 shilem ket nung permanent ali 'patta' mali aser kibong lakh 8 shibo parnok juri ali maka.

Nagaon district nung additional deputy commissioner-i ashiba agi, iba tesem nung ali shilem 70-bo lisopur masü saka bendanger li lir. Bendanger-i ali shilem paikaji atsüngbaji iba tesem nung dang asütsü, ta Brahma-i Deobarnü ashi. Iba committee ya February ita CM Sarbananda Sonowal tetuyuba nung kümteba liasü aser parnokni lisopur li kümzüka ayutsü asoshi lenmang bushia sorkar nem June ita tashi nungbo osang agütsütsü imlar.

"Assam ajunga nung arem, shiruru chiemdak aser tanga li dena sorkar ali bigha lakh 63 (1 bigha= 14,400 sq ft) ozüng

alema atsünga lir. Kasa mapang nung lisopur lakh 7 nungi 8 shibo ali inch kata maka. Maneni lisopurtem shilem 90 ket nung 'myadi patta' (permanent land settlement) mali, saka eksonia patta (annual land settlement) dang lir mesüra sorkar ali atsünger dang lidar," ta Brahma-i ashi.

Tinsukia, Dibrugarh aser Majuli district tem nung aliba lisopur aika, tetsü tebu mapang 1950 küm menoknok nung parnok li samaadok. Parnok ket nung kuli kaket mesüra alia mali, ta committee ajanga ngutet. Committee nem maneni British nung mapang Assam Land & Revenue Regulation Act, 1886 reprangshia yanglushitsü asoshi tetuyuba agütsütsü atema nongloktsü.

Iba committee dentettsü asoshi telemtetba agidang Sonowal-i ashiba agi, sorkari ali dak sendakba nung sentong tasen yanglutsü asoshi jenjang agidar, kechiyong ali milera Assam kin samatsü aser lisopur li kümzüka ayutsütsü sorkar mapa tongtibangtiba lir.

Education Minister-i Assam College tesayurtem aitsür



Guwahati, May 02 (Agencies): Commissioner of Higher Education ya bendanger lir aser pai state nung college tesayurtem bendanga amshir, ta Assam College Teachers Association tir-i ashiba o ya Education Minister, Dr. Himanta Biswa Sarma-i aitsür.

"Iba amala o jembiba ajanga linük memiembra sayur," ta Education Minister-i osangbener den jembidang ashi.

"Kaket rejutem inyakyim

nung teka aita amshitsü asoshi iba amala dentet nem tashi agüja mali aser nungdakba mapatem education department ajanga reprangtsü," ta sarma-isa ashi.

Provincialised college tem nung tazüng aliba mapatem asoshi tekeraba nung tatidang agütsü asoshi Minister-i Principal tem nem tetuyuba agütsüogo aser iba maparen ya June 15 tashi nung tembangtsü metetdaksü.

Tripura sorkari sempet balaka aketertem nem kibong akümdang teyari agütsüba ajungkettsü


Agartala, May 2 (Agencies): Tripura sorkari Mongolbarnü sempet balaka aketertem (differently abled persons) kibong akümba mapang sen agi teyari agütsüba 50,000-i ajungkettsüogo, ta minister-i ashi.

Chief Minister Manik Sarkar linisüba kübok Council of Minister tem senden ka nung sempet balaka aketertem kibong akümba mapang parnoknem sen 6,000 teyari agüja alibaji ajungkettsütsü asoshi telemtetba agi, ta Information & Finance Minister Bhanulal Saha-i osangbenertem dang ashi.

Iba teyari agütsüba ya 1986 küm nungi tang tashi nung mezüngbuba ajungketba asütsü.

2011 Census ajanga ngutetba agi, Tripura nung sempet balaka aketertem 70,000 shi lir, koba taoba mapang asadanga nungbo 57,000 dang liasü.

Tripura Pratibandhi Awdhikar Manch state Secretary Salil Debbarma-i iba mapa tajung atema Centre aser state sorkar tenüngasangba den külemi sempet balaka aketertem-i mapang talangka nungi khanga aruba madaloki aliba maparentem tem tekaraba nung reprangshia ataloktsütsü asoshi mepishe.



Imphal, May 2: Oil tanker gari tem amakba lendong nung gari anir ana yirutsüba sülen Hombarnü parnokni longkak aitba sentong ka ayongzüka aka. Gari anirtemi ashiba agi, parnok takhangba madaloktsü tashi parnokni longkak aittsü. Parnoki akhangba rongnung tongtibangtibaji Highway nung tekümzüka agütsütsü asoshi liasü.



TIR YIMYIM YIMOBILEM (EDITORIAL)

DIMAPUR WEDNESDAY, MAY 03, 2017

Bendangertem nem mapa agütsüba

Nagaland government kübok department aika nung sensopur masü saka tsümartemang mapa nung aniokba puteta Nagaland Congress teloki metetdaksüba osang ya Naga nung lanurtem asoshi taoksatsü osang ka lir. Naga nung lanurtem rongnung mazüngertemang teimba aser tazüngertemang teimba ta mapa inyaknüaka mapa mangu kazütepdang tsümartemang government mapa nung aniokba kolok aser tangatetbaji tezüdangtsüka lir. Ibaji pei lima aser pei senso memeimi inyakba mapa ka asütsü. Atangji, Naga nungertem ya office mapa nung tamshi tasak aser tashi manga asütsüa akok. Ano, aikati office mapang amshi mashi aser tila mekümtetba shisatsü alitsüa akok. Ajisüaka, asen lima nung asen nisung mapa maka aser chiyongtsüa maka ta yutsür tsümartemang government mapa nung aniokbaji bangdak nung alirtemi nübertem mezüngmeshiba mapa ka asütsü. Asenoki asen nisungtem dang azümasen ajar aser mapa magütsür. Ajisüaka, azümasenertem dang azümasen shir mapa magütsübaji shitak masü. Iba jagi asen lima aser loktiliba tamajungba dang küma aotsü. Aji oda, tanü asenoki asen lanurtem dak temulung melemtetba agi, parnok melen tangar nem mapa agütsür, parnokji odang toktsüra, iba jagi lokti aser yimten nung tebilemstü adoktsü. Tanü asenoki item timtemji ajurudagi. Item timtemji akoktsü atema tanü asen yimten aser lokti nung lanurtem nem tangatetba tajung agüja anitetsü aser akok tashi parnokji government aser private mapa nung anioka inyadaksütsü merangtsüla. Atangji, tanü lanurtem aikati peisasa mapa inyaksü lenmang nguteta inyakba angur. Ano, lanurtem aika tanga state-tem nung pei akok mapa tapu balala inyaker. Tangar state nung mapa kiburtemi ashiba agi, parnok kübok mapa inyakerter rongnung Naga nungertemsa tajungba aser tashi tangaba. Naga nung lanurtem ajaki Englishi jembitetter, parnokji wainshin temetet, mapa aika inyaksü koka lir aser temulung lemtetlettetter, tashi tanga, anungji temeimtsüka aser taginütsüka. Ibayongji, tangalen inyaksü atema Naga nung lanurtem kanga bushir. Ajisüaka, mapa kar dak alaka mapa aika nung ita sen aika mangur, anungji timtema inyaker. Item tensa tiiji repringteta Nagaland bangdak nung alirtemi lanurtem dang pei azüngba yari mapa inyak sayutsüla aser parnok dang kechi mapa inyakdir inyaka nendaka, temulung agüja shitak inyaksü tangatetba agütsütsüla. Tanü Naga nungertemi mapa nung temulung magütsüba, shitak meinyakba aser mapang mamshibaji parnok kija tai masü saka temalen mena alirtem daka tashimait aser tai tuluka lir. Kidang kibong nunga tsürabur jakla yimya ajizüka tanurtemi inyakba ama, mapa inyakdaka temaba jenjang nung amnertem jakla yimya repringer tilartemi parnok jiluji beshir. Nagaland nung kar dak alaka, tulurtem aika mapang shitak nung pei office-i orr mapa shitak inyaker mapang shitak nung pei kidangi meyipa aoba mali. Department aika nung tongti ketdangser office-i marur, anungji sign asütsü atema dang file ajunga kidangi bener yoker. Item tim masüba jakla yimya ajak melenshir, asen lima nung mapa inyakdak ajak nung tulubai anir tilaba tashi mapang shitak amshia mapa shitak inyakba sobaliba ka tenzüktetra, iba kija jagi Nagaland ya takar lima kümadoktsü. Tanübo asenoki asenoksasa asenok dak temulung melemtetba agi ki mapa nungi shir office mapa tashi tsümartem nem inyadaksür asenok tebok masüng timtema liteper. Iba ama tia nungi asenok nüji küma adoktsü nungdaker. Joko, government mapa nung balaka Naga nungertemi inyaktetba mapa nungbo tzümar meshimtsüla aser Naga nungertemia kechi mapa inyakdir inyakaka nümadangdanga aser jungjunga Tsüngremi moatsü ta bilema inyaksüla.

OLEMSABANG

North East India nung aliba nüburtem atema Cancer tashidak

- ~ L. Kika Pongener, Aoyimkü, Dimapur.

Northeast India nung aliba state-tem atema cancer tashidak tamajung ka anogo shia menokdangteti aser mesoitteti renlokjen renloka aoba, talila talila dang küma aoba tashidak tulutibaji Bendanger asen limai senoka aitba (Illegal immigrants) ya ka asütsü. Bendanger ta asüadang asenoki tzümar ajak ya tashishitsü aketba kin amai mangatetsüla, ajisüaka tashishitsü aketba kin ka lir, iba kin dangji bendanger (Illegal Immigrants) ta ajar. Küm ishika tejaklen nungi asen kidanger Assam, Tripura aser Meghalaya nung iba tashidak ya menokdangteti aruba tanü tashi manepteti kangshia timtemdagi. Talisa, Tripura state nungbo item kintem nem moksepdaksür ayatai tia nung lir, joko pei nisung lisopur dang nungi bendangerang teimba kümadoker, parnok nem amokbangdaksür kodamesüi timtem nung aliba asenoki ngudagi. Tanü asen lima nunga asenoki jungjunga süoki ia repringdangra ashiko Dimapur jila nungbo nütsüng ya shilem asemsü nung shilem kabo item bendangertem ya asütsü amai repringteter. Asenoki jungjunga asadanga odangra Dimapur jila nung oda toktsür, ano Dimapur meketa aliba jila tilatem ajunga nung shishilembartem ya jungjunga züngdanga ora asen lisopur dang nungi bendanger kanga agi talila züina kümadokogo. Anungji, iba ya kangasa tebilemstü khuret tuluka küma odagi ta asenok ajaki kanga shishia tenoktenoka bilemstüla tongtibang onük ka kümogo.

Anungji, ya zübazüba meyutsüi tawa kechi koda ULB election aser Women Reservation atema longjemer nokdak, iba amato longjemer iba atema ya-a nokdakra takok angutsü, talisa lanurtemi kanga temulong aguja inyaksüla. Küm ishika tejaklen AKM-i anir "Survival Mokokchung" ta ser sentong tenzüka inyakba kanga takok ngua inyaktetogo, aser tangbo Mokokchung jila terabo sünepa lir. Aser asen lisopur shishilembaba mapa nung aser teka mapa inyaksangshiba nunga aayangdak kaa anisüngzüka lia aoba kuli tejangja ngudagi. Taoba küm item tzüma-longmari asen lisopur tetsür dak tim masüba inyakba mechi jail tashi kakpoka lendong patakato atalokba ajakto item bendangertemi menasaba mapatem ajanga timtem adokba lir. Tesüiba küm ka ana tejaklen Dimapur nung kiyong kar nung asen lisopur kibong ka lenmang nung kinungbo alena yur tebuttsü dak tashiyim amshia mapa tamajung inyakba yamala tim masüba mapatem aika asenok tenüki ngua ajangshia aruogo.

Asen lima nung asen lisopur talitsü mesadem tsübuseta alitsüsa tensa tia ya asenoki zübazüba toktsüba ajanga adoker aser timatemer. Ano küm ka ana shi süiogo, item tzüma-longmar bendanger nisung kati asen Naga nung lisopur kar den MBBS degree azüngtsü seat raktepa lisopur anema Guwahati high court nung case agutsüba-a ajangshia aruogo. Iba ya asenok asoshi cancer tashidak maneptetba tashidak ka amai kümadokogo, aser cancer mesen tenük masepshi nung renloka aoba amai iba tebilemstü ya anogo shia renlokjen renloka odagi. Tongtipangsa, Dimapur jila nung iba tebilemstü ya nokdangtsü kanga saaka akümer, kechiaser train nung anogo nung noklang kwika bendangertem arua alitsü shibai züngdangtetsü. Anungji iba ya züba-züba metoktsüi kanga süoki ia senso ajaki bilemstüla.

Asen lima nung asenok lisopurtembo ayangdak maka, saka item tzümar bendangertembo jangratema ayanger, asenoki ibaji tenükmeremerba masü, saka parnok aliba agi parnok dak nendaker asenok lisopurtem azümesen akümer aser joko asenok parnok kübok parnok lar küma odagi. Joko Naga lima jila ajunga nung kisüjensü mapa ajunga parnoki inyakerji asen lisopur hazira aodak-a maka, bazaar nung dokan tulutiba nungi shir tilatiba tashi parnoki mener shishir-ji asen lisopur chiyimindak maka, oda oda sorkar office nunga tila-teri post ajunga item nisungtemi agiadokogo. Sen dang ngurbo item nisung yagi nisung tepsettsü apayua mebilemer, tetsür taküm raksatsütsü aakseta mebilemer, ashi auyatsü arendaka tsübuseta mebilemer.

Maneni taruba adok nung...

Iba Olemsabang nung lemsaba ken-o aser shisatsü ya iba ocet zülur-i bilemba ken-o ama tazünger-i angateta agitsü mepishir

Japukong nung Election Merüka agitsü yimyim ayimoktsür



Dimapur, May 2 (TYO): Japukong nung aliba lokti tentet pungu- Japukong Arogo Toklang Tenzüker Telongjem, Japukong Senso Senden, Japukong Kaketshir Telongjem, Japukong Watsü Mongdang aser Japukong Youth Organization temi February 14, 2017 nü Aonokpu nung senden ka mena tziukong nung Election Merüka (Clean Election) agitsü yimyim agütsüsü lemtetba ama April 30, 2017 nung mezüng yimtsüng 10 semaa election merüka agitsü yimyim ayimoktsüogo.

Iba yimyim agütsüsü asoshi lokti ajak nungi teshimtet nübo 50 shi Longchem nung April 29 nü sentepa, Wb. Imtinungkum

Lkr, Pastor Saring Baptist Arogo-i Clean Election terenemba aser teratet (documentary) renema aser tesayuba agütsü, ta tanü sangdong ka nung metetdaksü.

April 30 anepdang 6:00 ako nungi tenzüka Wb. Wapang President JATTT ajanga lokti sarasadem ayonger, lenir Wb. Alemyapang Longchar SDO(C) Longchem ajanga tayongzükba agütsü aser temerük election wako salaja yimtsüngtemi telok 5 lemsar apuso.

Pai ashiba agi, North Korea ama nungbo kija temeten magütsür aser ibajagi pei aginüba lenir shimtsü makoker, saka asen India limabo

Democracy asünung, kija shia pei temeden agütsür.

"Anungji asenoki sen yong asen temeden yoka mechii Pei lenir shimba nung ochishia election temzüngi melaba ama election agitsü yimyim agütsübaji sentong kanga junger" ta Wb. Alemyapang-i ayongzuk.

Iba tayongzükba nung lokti apusoa mezüng yimtsüng 10 sema jaja, yimtsüng shia nung kanga pelashishia agizüka taruba 2018 electionji merükteta agitsü asen tziukong nungi tenzüksüla ta ajungshitepba liasu. Ano tanünga yimtsüngtemi May 7, 2017 nung aotsü sarasadema atar, ta sangdong nungsa metetdaksü.

Minnesota nung Satanic Temple-i 'Luciferian Light' nüngshilung yanglutsü

Minnesota, May 2 (Agencies): United States kübok Minnesota tesem nung Christian memorial ka anasa Satanic Temple pur nüngshilung ka yanglutsü temelaba agütsüogo.

Satanic Temple pur nüngshilungji Belle Plaine indang Veterans Memorial Park anasa asütsü.

Taküm January ita yimti nung ketdangsertemi Christian memorial nung sepai ka kangki aser Laishiba ka tsüngdang aputaka yangluba kürakyanglu ka agien. Iba kürakyanglu atema Tsüngrem dak mamangertemi okadak ken o benoktsü tsübuba agi ketdangsertemi ibaji agien, ta The Star Tribune ajanga metetdaksü.

Yimti nung alirtemi kürakyanglu agienba anema nokdak saka ketdangsertemi park nung tesem ka "free speech zone" ta lemezüksü. Iba tesem nung tanga tamangba yimsütem aser teloktemi pei indang nüngshilung yanglutsü atema ketdangsertemi temeten agütsü.

Satanic Temple ya Salem, Massachusetts nung amenoka lir aser parnoki mapang talangka nungi iba tesem nung parnok indang nüngshilung ka yanglutsü

atema sentong atonga aru.

Satanic Temple indang nüngshilungji "black cube, nung pentagrams langkushishi kar aser helmet ka langkushishi sembanga lir."

Taküm February ita artist Chris P. Andres-i ashiba agi, nüngshilung jagi, metenüba aser tangatetba ajanga meimchir ajungba sayur.

"Nüngshilung nung pentagram pezü jagi Alima künük pezü sayur. Iba ya ajanga taküm bendanga agütsüba sepaitem asoshi satanic/pagan symbols/ideas indang bilemtetdaksür. Tanak sentsü jagi mangyimba aser angatetsü makokba aser tebilemba indang sayur. Hon sentsüji Luciferian tesangwa ka lir aser iba ya tamangba yimsü indang tamaitüsü ka ama lir" ta Andres-i ashi.

"Helmet tazünga kaji shisatsü agütsüba Baphometric bowl ka lir, iba yagi tekolok aser tebilemba kümzüka ayur. Iba nüngshilung nung tasürtem indang osettem ayutsü akok aser iba nüngshilung ya külemküjaba indang tamaitüsü ama lir" ta paisa shisem.

"Belle Plaine nung alirtemi Satanic Temple amala teloktemi park nung nüngshilung yanglutsü ta asüba atema süngmanga mebilemer, kechiyong nisung

ajaki iba ya ajurutsü ta meteta liasü" ta kangki agienba anema nokdaker rongnung tanishir Andy Parrish-i metetdaksü.

Tesüiba küm ishika Satanic Temple teloki public ground tem nung parnok nüngshilung yanglutsü atema temelega meshia okadak ken o aika benokogo.

2015 nung parnoki Arkansas state dang, Little Rock nung aliba Capitol grounds nung Ten Commandments monument anasa parnok indang Baphomet statue meyudaktsüra, okadak ken o benoktsü ta amokmerena liasü.

Yaküm November ita nunga Washington state kübok school ka nung elementary school kaketshirtem atema After School Satan Club program agitsü temelaba agütsü. Seattle nung amenoka aliba Satanic Temple-i iba school nung Bible club agidaktsür anungji After School Satan Club program agitsüla ta okadak ken o benok.

The Satanic Temple spokesman & co-founder, Lucien Greaves-i The Christian Post dang idakji alirtemi club pusema nungiter ta metetdaksü.

"Tacoma District nung tsüraburtemi onok pusemba shidi aika zülüogo aser iba jagi

ANO GO ABEN TSÜNGREM DEN

NISUNG SHIA SEMPET

"Nisung shiai sempet agizükba ama, aji agi Tsüngrem taochi jenti meyong ketdangpurtem tajung ama, nenok medemer O medemer na yaritepang"

- 1 Peter 4: 1 O

Sempet ya tapu aika lir, saka asenok taküm asoshi tongtipang sempet tapu ana lir aser ibaji alima sempettem aser teti taküm makaba, koba Tsüngremer sempet ya lir. Asenok alima nung alidang, Tsüngremi asenok nem alima sempet pei pei taküm takok angutsü asoshi lemezüksüba ya koda amshir? Ajak nem Tsüngremi sempet balala agüja lir aser asenoki item sempeji tim, ochi, aser Tsüngrem tsübua amshira, iba jagi Tsüngrem sentsüwangshidaktsür. Temeim adianu tem, asenok alima nung mapang tatsüka alidang Tsüngremi asenok nem lemezüksüba sempettem jagi asen takoker taküm ka sädaktsüdi.

Ano Tsüngremi asenok meimchir nem tematiba jenjang sempet agüja lir, aser iba Tsüngremer sempet koba asenok kotak atongtsü tanela apu agüja lir aji alangzükdi. 2 Timoti 4:7 nung Pauli yamai ashir, "Ni rara tajungji raraogo, ni alizüng tonga asemogo, ni tamangji yuogo" Tsüngrem sempet nung koba Pa temeim, taochi, teimla sayur ibaji asenok ajangzükdi.

SARASADEM:

Koba sempet nai bushia lir!! Arung asenok Teti tatem makaba sempetji asen mulungjang nung sodaktsüdi. Amen

NAGALAND MISSIONS MOVEMENT

--Lanu Cashier

1980 küm Nagaland Baptist Church Council-i (ANBC 79/415) May 1-7 ya "Nagaland Mission Day" ta tenüng jateter Nagaland nung Baptist Arogo ajak nung amongtsü lemteter monga aruba joko küm 37 junga monga arur. Tsüngrem mapa tali tajungba aser takokba nung inyaka aotsü asoshi nungja melenshia aruba Nagaland Missions Movement ta melener joko küm eshika arur.

Küm shia Kija, Kibong, Arogo aser Mungdangtemi sarasadem den tamang tenla agütsüba ajanga NMM ministry tang temoatsü aser takokba nung inyaka arudaki. Item ajak asoshi NMM Staff ajaki Tsüngrem tenüng sanga nenok dang pelaba iba osang ajanga lemsateper.

2017 küm asoshia sarasadem onük den envelope Arogo aser Mungdangtem dangi yokogo. Iba küma amangbapur ajaki tenla tajung agütsüsü amanga sarasadema atar. Tesarutetba sen NMM dangi yoktsü asoshi item tesemtem nung tongteprateptsü mepishir- Chungtia Yimsen, Mokochung Town Baptist Arogo, Changtongya Towwn, Tuli Town aser NMM Office.

Tsüngremi Ajak Moajangma.

NMAAM-i Kirk Franklin nem tetushi agütsüsü

Nashville, May 2 (Agencies): NMAAM-i June ita benjung- Black Music Month tenzüksütsü aser parnoki Nashville nung aliba City Winery nung June 1, 2017 nü 4 buba annual fundraising luncheon agitsü.

Iba sentong nung music industry nung otsü yanglutetertem aser tongti shilem agirtem nem tetushi agütsüsü aser 2017 Rhapsody & Rhythm Honoree temji, Patti LaBelle, Kirk Franklin, Teddy Riley aser David Porter (President's Award) nungertem lir.

Legends Luncheon sentong ya African American nungertemi America kentenba sobaliba nung otsü yanglutetertem tushiba sentong ka lir.



Iba sentong ya National Museum of African American Music(NMAAM) indang "My Music Matters" ajanga shisateta agir aser iba telok nung Tennessee executives, musicians, artists aser community leaders dena lir.

Legends Luncheon sentong ayonga agiba ya NMAAM indang youth & community educational programs atema senotsü bendenba sabang ka ama lir.



Impur Heritage Centre ya America Missionary temi 1895 küm Missionary tem alitsü asoshi yanglu aser lia arudang 1955-1976 tashi Hospital ka ama amshi. Board of Trustee Impur Christian Hospital ajanga iba ki ya Dr. James R. Bailey nüngtem (memory) nung Impur Heritage Centre ta yanglushia May 2, 2017 anogo Rev. Dr. Mar Atsongchanger Executive Secretary, ABAM-i meshiteta sarasadem agia Shrimati. Aolemla Additional Development Commissioner, Nagaland-i inaugurate sütsüogo.

OLONG PAITEP # 4410

| | | | | | | | | | |
|----|----|--|---|---|--|----|--|--|----|
| | 1 | | | 2 | | | | | 3 |
| | | | | | | | | | |
| 4 | | | | | | 5 | | | |
| | | | 6 | | | | | | |
| | 7 | | | 8 | | 9 | | | |
| | | | | | | | | | |
| | 10 | | | | | | | | 11 |
| | | | | | | | | | |
| 12 | | | | | | 13 | | | 14 |
| | | | | | | | | | |
| | 15 | | | | | | | | |

TIPIEN

- 1. Tiyong nung (9)
- 4. Tenüng atet (3)
- 5. Chi bendendak (5)
- 7. Kiyimla (9)
- 10. Ki anasa (9)
- 12. Tiyazü (5)
- 14. Ali nung tsük (3)
- 15. Tatok magütsüi meyipa inyaktsü merang (9)

LANGTSÜNGLEN

- 1. Tenarong majung (5)
- 2. Teküp sülen aliba (3)
- 3. Saklok (5)
- 6. _____ hi (4)
- 8. Ne sasa (3)
- 9. Tanur masü (4)
- 10. Ki temalen (5)
- 11. Ibaji _____ (6)
- 13. _____ in (3)

OLONG PAITEP # 4409 TELANGZÜBA

TIPIEN :

- 1. Maka 5. Ocet 6. Tekülak 10. Ano. Bilemdang 12. Tar 15. Chisang 17. Aket 18. Tasü

LANGTSÜNGLEN :

- 1 Metsü 2. Asü 3. Yiar 4. Tekong 7. Kilir 8. Ber 9. Odi 10. Anasa 11. Bangka 13. Angsü 14. Shin 16. Sot

ALOKBAI DOCTOR KA ARASENTSÜR AMAIA TA ANGASHIA PA DANGI AOR :

Doctorba....Doctorba.. Ni Tekolak kanga angor, joko ita 10 buba, koma asütsü??

Alok, Nagaland nung State Assembly Election agitsü ita 10 dang anunga lir, anungji iba election temerbo ne tekolak angobaji anenadoktsü. Shisatebulu....



Lilir : ISK, Dimapur

TANÜBO NAI LANGZÜANG

Q: India nung tang mezüng Blind Football Academy (BFA) kong tenzütsü?

- [A] Tamil Nadu [B] Sikkim
- [C] Uttar Pradesh [D] Kerala

(Taruba adok nung onoki langzüksü)

YASHIADOK TELANGZÜBA : Vijaya Lakshmi Pandit

Tepela Tasoba Anogo

Tanur asoba anogo nung salem osang den noksa angat adokdeksünüra - Tenüng, Küm, School, Talidak & salem osang tejanga zülur, noksa (photograph - any size) ka den anogo 3 mesüra 4 jela e-mail : tiryimim@gmail.com nung yokang mesüra Tir Yimym bureau tom nung agüjang.



1. Tenüng : _____
 2. Tasoba anogo: _____
 3. Küm : _____ 4. Class : _____
 5. School : _____
 6. Talidak : _____
 7. Salem osang : _____

NAIA YA METETER MA



- * Alima nung aliba ak shilem 50 shibo China nunger aluyimertem ket nung lir
- * Nisung tenük dang nungibo azü tenük tajungba
- * Mejai kodanga memejanger aser meja dak tepokpok mali
- * Shiti-i mile asem pilar aliba tzü menemteter
- * Nai küpra tenük intoktsüra ano tenük tasen ka adoktsü
- * Alima nung atsük tapu 3,000 shi lir
- * Alima nung azü million 40 shi lir
- * Alima nung per tapu 2,700 shi lir
- * Shin-i tetsüng agi chiyungtsü tendangteter

SUDOKU # 3523

TELANGZÜBA # 3522

| | | | | | | | | | | | | | | |
|---|---|---|---|---|---|---|---|---|---|---|---|---|---|---|
| 7 | 8 | 9 | 2 | | 9 | 5 | 3 | 7 | 1 | 6 | 4 | 9 | 8 | 2 |
| 2 | | 1 | | | 8 | 8 | 2 | 6 | 5 | 9 | 3 | 7 | 4 | 1 |
| 5 | 6 | | 3 | | 2 | 9 | 4 | 1 | 2 | 7 | 8 | 3 | 6 | 5 |
| | 8 | 7 | | | | 3 | 7 | 5 | 8 | 1 | 9 | 6 | 2 | 4 |
| 4 | 1 | 6 | | | 7 | 6 | 8 | 2 | 3 | 4 | 7 | 1 | 5 | 9 |
| 6 | | | 9 | 1 | | 4 | 1 | 9 | 6 | 5 | 2 | 8 | 7 | 3 |
| 7 | | 4 | 1 | | 2 | 1 | 9 | 4 | 7 | 2 | 6 | 5 | 3 | 8 |
| 8 | 1 | 6 | | | | 2 | 6 | 8 | 9 | 3 | 5 | 4 | 1 | 7 |
| 9 | 2 | | | 6 | 5 | 7 | 5 | 3 | 4 | 8 | 1 | 2 | 9 | 6 |


OJANG LUTEP # 4015

- UNGNISI :
- DEMMEER :
- STSHIMÜ :
- KAOK :
- KASA :
- IAADNU :
- SÜMERA :
- KGERINÜNBO :
- SSÜHIMT :
- MOKAK :


OJANG LUTEP TELANGZÜBA # 4014

TANGARI INYAKERALIBA MAPA NUNG AMUSHIBA AJANGA TERAKSATALI ADOKER


Anü ita petinu ajanga alima nung tsüngsang mopung melenshidaksüba ama nisunger tia-a melenshidaksür ta anü ita petinu tetzürtemi ashir, parnoki ashibaji shidak asü tai'ar nai-a na asoba ita anogo den tanü nü tia medemdangang (Horoscope):

- 


Aries
21/3-19/4

Tanü nai medemertem den tesendaktep tajung ayutsü mebilemstsü. Mapa kar nung takok ngunüra tangari ashiba o nai angatsüla.
- 


Taurus
20/4-20/5

Na asoshi tasak süaka tanü nisung aikati na ajungshitsü aser aitsütsü. Nai mapa junga inyakba ajanga tangari na sapur.
- 


Gemini
21/5-20/6

Tanü nai takotet nisung ama jembitetsü aser aji kanga tajung lir. Aser nai jembiba aser nai ajungshiba nisung aikati züngzünga angatsü.
- 


Cancer
21/6-22/7

Tanü nai tangar den jembishinüba mapang kümdangtsüla. Nür kinungertem den jembiba ama tangar den jembiba ajanga mangatettep adoktsü südi.
- 


Leo
23/7-22/8

Maparen kar nung nai achaayanger ka ama inyaknüa bilemstsü aser nisung aikati aji makinütsü. Tanü nai mapa aika nung takok ngua inyaktetsü.
- 


Virgo
23/8-22/9

Nai makoktsü südi ta bilemba mapa kar inyaktsü merangang. Lokti den külemi mapa inyakang aser nai terenlok angutsü.
- 


Libra
23/9-22/10

Tanü nai tanger yaritsü tebilem saka nü mapa nung temolung agüjang. Tangar den külemi mapa inyakba ajanga mangatettep adoktsü.
- 


Scorpio
23/10-21/11

Tanü nai tangar angatetsü merangang aser nü tejen otsütem bilemdangang. Nü tenüng temabai ajungkettsü asoshi nai meranga inyaktsüla.
- 


Sagittarius
22/11-21/12

Tanü nai lokti mesüra medemertem den jembiba o ajunga parnoki kanga junga agizüktetsü. Anungji nai kanga junga shisadangtsü mapang tajung asütsü.
- 

Capricorn
22/12-19/1

Tanü nai shiba den jembidir kümdanga jembiang. Nai nükjidong tajung yoang aser aser aji koktetsü merang inyakang.
- 

Aquarius
20/1-18/2

Nü mapa aser sentongtem nung takok ngunüra, nai medemertem den junga sensaksem akatsüla. Saka nisung aikati nai bilemba nung mejajatsü südi.
- 

Pisces
19/2-20/3

Nai metetba aser nü dak aliba shisatsü tanü mamshitsü merangang. Nai teti inyakba mapa kar nung temolung agüjang.

Akshay National Award angutsü tetemsü

Panaji, May 2 (Agencies): Taküm küm Best Actor National Film Award Akshay Kumar nem agütsübaji pai langa aliba ajanga lir, ta Hera Pheri nung külemi shilem agisang Actor Suniel Shetty-i ashi.

Tawa Akshay nem commander K.M. Nanavati dak ajemdaker yangluba film Rustom nung shilem tajung agiba atema Best Actor award agütsü. Aji saka film yanglur Priyadarshan-i anir award agütsütsü asoshi nisungtem shimba nung, Akshay nem iba award agütsüba atema nüburtem shilem kati aitsü.

"Nüburtemi Akshay-i aitsüba ya kanga dang tai. Pai nüngtugu film aika nung shilem agiogo. Kechiba nenoki film ka dak dang rangloker. Pai film 100 ka

dak tema nung shilem agiogo aser pai iba tetushi sempet angutsü kanga tetemsü," ta iba dak sendakba ken o nung Suniel tebilemba asüngdang dang pai langzü.

"Pa taoba kümtem nung shilem agibatem asadanger iba tetushi agütsü südi. Army uniform asem dang actor ishekate dang akümtsü tagütsütsü tim agütsür aser item rongnung Akshay-a ka lir," ta pai shisem.

Nüburtemi pa iba sempet angutsü temsüa mali ta bilemra pa ket nungi iba tetushi agienang, ta taoba mapang Akshay-i ashi.

Suniel-i Akshay den; Aan: Men At Work, Dhadkan, Hera Pheri aser Sapoot film amala nung külemi shilem agia liasü.

"Akshay film nung shilem agi tenzükdang film 13 tashi tamakok ngua liasü aser aikati pa career idakji tembangtsü ta ashi, saka tang reprangdangra pai sen crore 100 tashi aazüktetba film nung mapang shia shilem agiba angutsü. Pai iba ken o amadoktsüla aser mepelai mebilemstsüla. Rustom film atema iba award mongura Airlift film nung shilem agiba atema iba award angu ta bilemang," ta Suniel-sa ashi.

Suniel tang TV show "India's Asli Champion... Hai Dum" nung shilem agitsü atema renemshidar. Iba show Honibarnü nungi sayutsü.

Iba show nung nüburtem maparen balala ajanga parnok kolok aser 'physical fitness' tendangtsü.

George Michael ken Careless Whisper mezüngbuba jenjang nung lir



'Smooth radio' angar million 5.4 den külemi onok indang 'Bank Holiday weekend' 'countdown' ya pa taküm aser music tushia amongba maparen tajung ka liasü," ta Richard Park-i ashi.

Michael indang ken ya 'Bank Holiday weekend' nung nüngtugu radio station ajanga ken 500 atemba nungi nisung 30,000-i vote süa shimtet.

Maneni osang ajanga ashiba agi, iba chart nung pa indang ken 19 züngsema liasü koba Sir Elton John den kasa lir.

Michael asüba sülen pa ken iba chart nung alibatem jenjang temabai tuogo. Item rongnung; 1996 küm sayaba 'Jesus to a Child' ken jenjang 400 tashi temabi atu iba den külemi 'Father Figure', 'Don't Let the Sun Go Down on Me' nunger densema lir.

'Smooth' ya UK ajunga nung 97-108 FM, DAB digital radio aser TV, SmoothRadio.com aser Smooth app nung angutsü.

May 02, 2017 (Agencies): Asür George Michael ken 'Careless Whisper' ya tang tashi tena aliba kentem rongnung mezüngbuba jenjang nung 'Smooth Radio' angartemi shimogo.

Kentener ya yaküm küm December ite arishi küm 53 asü dang aoksa süadok, saka 1984 küm atenba pa indang ken ya 'British radio station's All Time Top 500 chart' nung mezüngbuba jenjang nung lir.

Taoba mapang 'Wham'

kentenba telok nung züngsem ya alima nung sempet tajung aketer rongnung temaba jenjang nung tang tashi züngshir aser pa süaka nüburtem molungjanga nung tang tashi lir.

"George Michael ya alima nung sempet tajungtiba aketer rongnung ka liasü aser 'Smooth's All Time Top 500' kentem nung mezüngbuba jenjang nung aliba ajanga linük nung alir molungjang nung tang tashi pa mamadoki aliba tali jangjashitsür. Uk ajunga nung



New York, May 2: (tabelen nungi tajichi tashi) Candice Swanepoel, Sofia Richie, Chloe Bennet, Behati Prinsloo aser Joan Smalls nunger Metropolitan Museum of Art Costume Institute Gala-i arudang tangokba noksa nung angur.

TAN HOPTA ATEMA - KOMA SÜLA ?

Q. Govt office ajak nung anogo shia biometric system amshia tenüng aja nunga koma süla ?

Olong 20 shi nung May 05, 2017 tashi nung iba telangzüba ya onok dangi

e-mail - tiryimyim@gmail.com mesüra SMS - 9856121232 / 9436072422 mesüra Tir Yimyim Facebook account ajanga yokang. Telangzübatemji taruba Hokolbar nü adoktsütsü.

India nung Samsung QLED TV tem sayaogo, sen 3,14,900 nungi tema agi angutsü



New Delhi, May 02 (Agencies): Paris nung sayur aliba QLED TV tem India nung Samsung India ajanga Mongulbarnü sayaogo.

Company ajanga India nung QLED TV model pongu - Q7, Q7F, Q8, Q8C aser Q9 saya aser item TV jenjang sen 3,14,900 nungi 24,99,90 tashi agi angutsü. Item TV model pongu ya India nung tain ita nungi alitsü akoktsü.

Item QLED TV ya jelia

müka-a ayuba ajanga sempet angutsü sentong kar South Korea nung aliba Samsung company-i metetdaksüogo.

QLED TV ya May 2 aser 21 tsügta jelia müka-a yura Hon sentsü nung aliba Samsung Galaxy S8+ smartphone ka angati agütsütsü.

Samsung Q7, Q8, Q8C aser Q9 TV tem panel tasazük ya inch 55, 65 aser 75 nung angutsü aser Samsung Q7F TV indang panel tasazük ya inch 55 aser

65 nung dang angtsü.

Samsung QLED TV tasentem ya Quantum Dot technology nung lir aser iba TV nung aliba 'nano-size particle' tem ya sentsü nungi tesangwa melenshir, ta company ajanga ashi.

Item TV tem indang tesangwa ya nits 1,500 nungi 2,000 tashi ayutsü akoker aser 'colour volume' shilem 100 tashi agütsür.

Item TV indang display technology tasen den külemi jara nung junga menaloktsü asoshi 'mounting' tasen inoka lir. Samsung indang QLED TV tasentem nung 'Gravity Stand' mesüra 'Studio Stand' amshitsü akoker.

Item QLED TV nung 'voice control' keta lir; Android aser iOS indang Samsung Smart View app; Samsung TV Plus service tem aser Shazam music service keta lir, ta company ajanga sangdongogo.

TRAI-i Airtel, Vodafone aser Idea dang senchi sen crore 3,050 achiba reprangshitsü

New Delhi, May 02 (Agencies): Reliance Jio nungi call asüdang Airtel, Vodafone aser Idea temi 'connectivity' magütsüba ajanga item company asem dang Telecom Regulatory Authority of India (TRAI)-i senchi sen crore 3,050 achiba ken o ya TRAI ajanga Telecom Ministry nem May ita nung tejangja metetdaksütsü.

"Onoki Department of Telecom dangi anu kicha mezülu. Saka onoki tekeraba nung zülutsü.... Onoki iba telangzüba ya tain ita agütsütsü," ta TRAI mendenbuba, RS Sharma-i ashi.

TRAI ajanga iba senchi achiba temzüng ya reprangshitsü asoshi Telecom Department ajanga April 5 nung zülua lir.

Reliance Jio mesayai tendangba mapang iba network amshirtem züngsem koika liasü, item ajunga züngdang Telecom Department nem agütsütsü asoshi TRAI dang shia lir.

Taoba küm item company asem aser Mukesh Ambani indang Reliance Jio tsüngda 'call

connectivity' nung mangatetep adok.

Jio amshirtemi Airtel, Vodafone aser Idea network tem nung call süa jembitsü asoshi 'interconnect capacity' peria makütsür, ta Reliance-i aitsü. Saka angati jembitsü sentong yangluba asoshi item company asem ajanga meyiber Reliance aitsü.

'Interconnection' ajanga mobile amshirtemi network balala den jembitet aser iba ajanga mobile service dem tim-i inyakyonga aor.

Bharti Airtel, Vodafone aser Idea Cellular temi Jio nem 'interconnectivity' magütsüba ajanga item company asem dang senchi sen crore 3,050 achitsü asoshi taoba küm October ita TRAI ajanga Telecom Department nem temelaba agütsü.

Airtel aser Vodafone dang senchi sen crore 1,050 aser Idea Cellular dang sen crore 950 achitsü langa lir, ta TRAI ajanga ashi.

Saka item network amshirtem timtem ajurutsü aliba ajanga TRAI-i 'telecom licence' bo meyiba memeshi.

Iba ken o ya Telecom Department nung sentong yangluba tentet tuluba, Telecom Commission nem agütsü saka iba ken o ya tanaben reprangshitsü asoshi TRAI dangi meyiba agütsütsü atema Telecom Department nem nungloktsü.

Item telecom company asem dang 'interconnection' anogo 90 tashi nung agütsütsü totuyuba TRAI ajanga agüja aliba ya TRAI den jangjashiteptsü asoshi Telecom Department nem Telecom Commission-i nunglokja lir.

Dubai tenüng nung 'Microsoft font' yanglua lir

Dubai, May 02 (Agencies): Alima nung yimti tenüng nung 'Microsoft font' yangluba ya Dubai tenüng nung mezüng yanglutetogo.

Iba 'Dubai Font' ya Dubai indang Crown Prince aser Executive Council nung mendenbuba, Sheikh Hamdan bin Mohammed bin Rashid Al Maktoum-i Deobarnü sayatsü.

Iba zülujang ya yimti nung aliba sorkar indang kakat reju ajunga nung amshitsü asoshi Sheikh Hamdan-i totuyuba agütsüogo.

Iba zülujang tasenba ya alima ajunga nung Microsoft

Office 365 amshir million 100-i amshi tenzükogo aser yimti ka tenüng nung kasa yimti ajanga zülujang tasen yanglutetba ya ibai mezüng lir.

'Dubai Font' ya linük 180 aser oshi 23 asoshi Arabic aser Latin temeyoktep nung yanglu aser anu tanga oshitem nung yanglutsü sentong lir.

Iba zülujang ya www.dubaifont.com nung angati download süa system nung inoka amshitsü asoshi Dubai indang Executive Council ajanga temelaba agütsüogo.

Arabic aser English oshi

nung amshitsü atema Dubai tenüng inoka zülujang yanglutsü asoshi Sheikh Hamdan-i Executive Council indang General Secretariat nem 2016 January nung totuyuba agüja liasü aser iba zülujang ya oshi tali 21 nung amshitsüsa yanglu.

Monotype UK nung Type Director aser Legibility Expert, Nadine Chahine-i anir nisung trok-i iba zülujang ya burapitet.

Iba zülujang ya 'Dubai', 'Dubai Medium' aser 'Dubai Light' nung angutsü aser 'italics', 'underlined' aser 'bold' nung amshitetsü.

Videocon Krypton sen 7,200 agi angutsü

May 2, 2017 (Agencies): Videocon Smartphone ajanga Krypton 22 sayatsü asoshi renemshidar. Krypton 22 nung Android, 'third-party appliances & electronics' control asütsü atema IR Blaster, USB connectivity, pen-drives aser USB-powered accessories tem atema OTG support aser 'slim design' keta lir.

Krypton 22 nung ano 2GB RAM, MiraVision Display aser tamshirtem atema VoLTE & VoWi-fi amshitetsü lemanng lapokja lir.

Krypton 22 nung VoWi-fi feature keta lir koba ajanga tamshirtem nem phone number kasa aser 'smartphone dialer interface' kasa ajanga 'cellular network' aser 'Wi-Fi network' nungi call sütetsü asoshi maongka agütsür.

IR Blaster yangluloka aliba ajanga Krypton 22 yagi Television, set-top boxe, fan,

Stereo sound system, Air conditioner, DVD player tem parnok indang remote control mamshi-i dang control sütetsü.

Maneni tamshirtemi Krypton 22 ajanga 'hybrid pen drive' aser 'SD card' tem amshitetsü. Iba nung ano 'Shoto-app' inoksema lir koba ajanaga noksa aser video tem pasasa dang album nung atongteptsür aser medemertemi noksa agibatema metetdaksür.

Krypton 22 nung anosa 'SOS-Be-Safe' aser 'panic button' keta lir. SOS-Be-Safe feature ajanga lendong mapang kinunger adianutem nem pa/la aliba tesem jangjaa metetdaksür. Iba handset ajanga Eros Now & 1 full version Gameloft game, küm ka atema subscript asütsü asoshi maongka agütsür.

Videocon Krypton 22 ya shishilembadak sen 7,200 agi angutsü.

Mobile Tower Radiation ajanga nisung temang nung timtem magütsür: Communications Minister



New Delhi, May 2 : Tanü Communications (Independent Charge) & Railways, Minister of State, Shri Manoj Sinha-i Tarang Sanchar Web Portal, New Delhi nung amenloktsüba yangi noksa nung angur.

May 2, 2017 (Agencies): Mobile tower nungi 'radiation' adoker ta tsübutepba nung Mongolbarnü Communications Minister, Manoj Sinha-i ashiba agi, "Alima ajunga dang nungi India nung mobile tower dak sendakba nung inyakyim 10 ben agi tesashiba lir aser tesendaktep tajungba agütsütsü asoshi tower timba amenloktsü nungdakba ajitetet."

"Asenoki network majungba indang teti jembir, saka asen ki anasa tower amenloktsübo memolunger," ta Minister-i Department of Telecommunications (DoT) indang web portal 'Tarang Sanchar' amenlokba sentong nung ashi.

Iba portal ya mobile tower aser electromagnetic field (EMF) emission compliances dak sendakba nung osang lemsteptsüba atema lir.

Nisungtemi inyakyim ka kodang jangjaa memetettir idangji olulu prokshir. Tesendaktep tajungba akümtsü asoshi kiojen timba nungdaker, ta Manoj Sinha-i ashi.

"Radiation ajanga nisung temang nung kecha timtem

magütsür. Küm 30 tsüngda nung World Health Organisation ajanga campaign 25,00 shi agiogo aser mobile tower radiation ajanga nisung temang nung timtem agütsüba kecha shia mali," ta paisa ashi.

Tarang Sanchar portal amenlokba ajanga nisungtemi mobile tower aser EMF emission dak sendakba nung aibelena angateta alibattem angajemdaksütsü, ta Sinah-i shisem.

Pai ashiba agi, iba portal ajanga nüburtemi tesem ka nung tower amenloka alibaji sorkari EMF emission norm lateta toktsüba den putep asü meputepar jangjaa metettsü aser nüburtemi metetnürä tower aliba tesem mashi ka indang temetetsütem email ajanga yoktetsü.

Maneni nisung mashi kati online ajanga sen 400 agütsür tesem ka nung EMF emission asadangba ngutetsü. Iba tetendangba ya Telecom Enforcement Resource & Monitoring (TERM) ajanga asadangtsü aser shibai iba osang aginüa asüngdangtir pa nem agütsütsü.

Asür sepai kibongtem den linük nüburttem lir: Kiren Rijju



May 02, 2017 nü New Delhi nung aliba Palam Airport nung Minister of State for Home, Kiren Rijju-i BSF Head Constable, asür Prem Sagar tasü mang nung naro yutsüba noksa nung angur.

New Delhi, May 02 (Agencies): Jammu & Kashmir nung aliba LoC nung Pakistan army temi tepsetba sepai ana kibongtem den linük nüburttem lir, ta tanü Mongolbarnü Minister of State for Home, Kiren Rijju-i ashi.

Asür ana- BSF Head Constable Prem Sagar aser Indian Army, Naib Subedar

Paramjeet Singh na nem akhüm agütsüba sülen minister-i, "Pakistan army temi ceasefire oziung alema tepsetba sepai kibongtem den linük nüburttem dena lir," ta ashi.

Delhi Airport nung Sagar nem naro akhüm agütsüba sentong nung adenba sülen osangbenertem den jembidang pai iba o jembia liasü.

Pa tasü mang Uttar Pradesh kübok par yimtsü ngi bener ogo.

Ano asür, Paramjeet Singh den asüpila sentong tanü Punjab kübok par yindak agia liasü.

Yashi Jammu & Kashmir kübok Krishna Ghatai sector nung Pakistan army temi India nung sepai anaji tepsetba sülen tasü mangji rangsaja liasü.

Tir candidate shimtsü atema opposition lenirtem ajurute p

New Delhi, May 02 (Agencies): Election aika nung Bharatiya Janata Party (BJP)-i takok nguyonga aruba agi opposition party tem küm kumshio go aser parnok rongnung telongjem nung daker ta bangjemogo.

Tanü opposition party balala nungi lenirtem ajurua Sangh Parivar indang tangatetbatem anema longjemer raratsü asoshi parnoki o lemtepa liasü.

Communist Party of India (Marxist) tongti lenir, Sitaram Yechury-i, Tir candidate ka longjemer shimba ajanga opposition telongjem tendanger asütsü, ta ashi.

Communists party tem indang tangatetbatemji Congress party aser socialists party tem tangatetba den khenyongi balala lir.

Ano külen Congress lenir, Digvijaya Singh-i, Mahatma Gandhi aser Jawaharlal Nehru

nungeri ratetsüba secularism nungittsü atema mapang tongogo, ta ashi.

Secularism indang Gandhi tangatetba ajanga Rashtriya Swayamsevak Sangh nokdang, ta shia Singh-i, "Gandhi indang secular tangatetbaji India den kanga tapet," ta ashi.

Janata Dal (United) lenir, Sharad Yadav ya Congress tangatetba anemer ka lir, ajisüaka tanübo pai taoba Ato kilonser, Indira Gandhi indang foreign policy pusema jembia, koba ajanga 1971 rara nung India-i takok ngua liasü.

Socialist lenir, Madhu Limaye sor küm 95 ajungba anogomung sentong nung item lenirtem sabang ka nung ajuruteptsüa akum.

Party tem longjemtsü atema jembiba dak alia opposition lenirtemisa tekümdangtsü onüktema jembia liasü.

Congress lenir Singh-i, 1971

küm opposition party tem longjemer Indira Gandhi anema apuso saka tamakok angu, ta ashi. Iba mapang nungji Indira Gandhi-i yamai ashi, "Parnoki Indira anenang ta jembia, saka nibo sensaktia anenang ta ashir." Singh-isa, iba raraji nisungtem tsü ngda masü saka tangatetba balala tsü ngda rara ka liasü, ta ashi.

Yechury-ia, Tir candidate atema longjemer candidate ka shimbaji mezü ng tetendanga ka asütsü. "Asenoki tamasa ibaji inyakdi. Iba sülen ang asenoki taruba meraji agitsü," ta ashi. Yechury-isa, democratic party temi longjemer common minimum programme ka bangjema yanglutsüla, ta ashi.

Singh, Yechury aser tanga party lenirtemisa, Modi'er sorkar mapatongtem ajanga teshimtet nisung kar ket nung dang rongsen bendener ta bangjema liasü.

Uttar Pradesh Cabinet-i GST agizük

Lucknow, May 02 (Agencies): Mongolbarnü Uttar Pradesh sorkari state nung Goods and Services Tax (GST) mapa küma inyaksü atema agizükogo aser kasaji state Assembly nunga agizüktsü.

Lucknow nung Chief Minister, Yogi Adityanath-i anir amenba cabinet senden nung GST ji agizüka liasü.

"Tan sorkar mezü ngbuba assembly nung GST agizüka mapa küma inyakba ajanga state saru timba akumtsü imlar," ta Cabinet Minister Suresh Kumar Khanna-i metetdaksü.

"GST benokba ajanga state

senpong nung khuret arura taruba küm pongu atemabo sorkari (Centre) temenok agütsütsü. Ajisüaka Petroleum products bo GST küboki maittsü," ta paisa shisem.

Ano külen state cabinet senden nungsa mapatong tasen ka agizükogo, kong Group B ketdangsertemji parnok departmental tekolakpurtemi transfer sütsütsü aser Group B dak temaba ketdangsertemji sorkari transfer sütsütsü.

"Transfers telatetbaji shilem 20 shi asütsü aser iba nungji m a t a m a b e n s a r t e m b o (divyangs) madentsü," ta minister-isa ashi.



New Delhi, May 02, 2017: Mongolbarnü New Delhi nung Finance, Defence & Corporate Affairs Union Minister, Arun Jaitley-i ICICI Group indang mapatong, '100 ICICI Digital Villages' tenzü ktsüba noksa nung angur. Kasa noksa nung ICICI Bank MD & CEO, Chanda Kochhar-a angur.

CBSE school tem dang, kaket, uniform mayoktsü court-i tuyu

New Delhi, May 02 (Agencies): Mongolbarnü Delhi High Court-i Central Board of Secondary Education (CBSE) dang, parnok den affiliate süa aliba school tem nung kaket aser uniform ayokba densema shishilembaba mapa meinyaktsü tuyuogo.

Acting Chief Justice Gita Mittal aser Justice Anu Malhotra nati akümba bench-isa, iba dak sendakba nung tawa CBSE-i sangdong ka agütsüogo, ta metetdaksü.

"Iba tetuyubaji shitak inyaksü atema onoki CBSE nem metetdaksür," ta bench-isa ashi.

Lokti atema inyaker, Sunil Pochriyal-i temepishiba shidi ka nung, yangi aliba school temi parnok building nung kaket aser uniform ama shishilembaba mapa nokdangtsüla ta temepishiba ka benokba court-i angadanga liasü.

Ajisüaka iba temepishibaji anema CBSE densema ketdangsertem, "Iba temepishibaji nüburttem taginüba masü. Iba temepishibaji pa sasep nung lir," ta ashi.

Ajisüaka court-i, "iba ya nüburttem taginüba, talisa school-i aor tanurtem aser parnok

tsüraburtem taginüba lir," ta ashi.

April 19, 2017 nü CBSE-i temetdaksüba ka nung parnok den affiliate süa aliba school tem dang, shisaliok rijutemi shishilembaba mapa meinyaktsüla, kaket, uniforms aser stationery ayokbaji oziung alema, ta metetdakja liasü.

March 3 nü agütsüba temepishiba nungji court dang, 2011 küm February 21 nü CBSE-i tuyubaji mapa küma inyaksüla, ta shia lir.

Temepishiba shidi nungjisa, tsüraburtemi shishilembaba tesemtem nung jenjang dalangtiba agi kaket aser uniform alitsü atema parnok nem CBSE-i temelaba agütsüogo, saka school temi ibaji memelar, ta metetdakja liasü.

Shidi nungjisa, school telung nung aliba dokantem nung school ketdangsertem den tesendaktep aliba nisungtemi shishilembaba mapa ajanga tajangzük jenti angur, ta shia lir.

"Shishilembaba tesemtem nung sen 500-i alizükba tsü ngsemji school store tem nungbo sen 1,200 nungi 1,500 tsü ngda agi ayoker," ta shidi nungjisa metetdakja liasü.



Phagwara, May 02, 2017: Mongolbarnü Punjab, Phagwara nung 8buba Lovely Professional University Convocation nung Lovely Professional University Chancellor-i Tir, Pranab Mukherjee nem Doctorate Honoris Causa Degree agütsüba noksa nung angur.



May 2, 2017 nü Brussels, Belgium nung European Council President Donald Tusk-i Myanmar State Counsellor Aung San Suu Kyi den ajurutepa salemdang agiba noksa ka angur. (Brussels, May 2)

Denmark nung sayutsüngir 6 nokdang

Stockholm, May 2 (Agencies): Mongulbarnü Denmark-i bendanger sayutsüngir trok tashi nokdangogo. Parnoki tesempatep adoktsü atema sayutsüngir ta tai tonglokja küm ana atema nokdang.

Sayutsüngirtem rongnung Muslim nung 5 aser American Evangelical pastor ka lir.

Parnokji Saudi nung 2, Canada nung ka, Syria nung ka aser America nung ana lir. America nung rongnung 2011 küm Koran rongdoktsüba pastor Terry Jones dena lir.

"Denmark nung democracy aser nüjiso o meimchir temeten indang telatetbatem anema

sayutsüngirtem magizüker ta iba tenokdangba ajanga sayur" ta Immigration & Integration ministry sangdong ka nung metetdaksü.

May 2016 nung Denmark sorkari tamangba yimsü tsütsü talila bilemloka oa inyakertem bushitsü aser parnok nokdangtsü atema osang metetdaksü.

Denmark nung aliba mosque tem nung hidden-camera documentary ka ajanga sayutsüngirtemi tesempatep adoktsü atema tesayuba agütsütsü kuli anguba sülen sorkari iba telemetba ya agi.

Palestine nung asor Denmark lanur ka tepuokdak ayudang tangartemi tesayuba

tai sayu aser 2015 küm pai Copenhagen nung Islam aser free speech o atsütepba sentong ka nung Danish filmmaker ka tepset aser iba sülen synagogue ka nung Jewish security guard ka tepset.

2015 nungsa Morocco nung kati al Qaeda den tesentaktep alir putir kati züluba kakettek prokshiba atema tai tongloktsü aser 1988 küm pai Denmark senso ngur aliba meyipa agien.

2005 küm Denmark osangkaket Jyllands-Posten-i Prophet Mohammed indang cartoon tem adokba sülen Muslim nungertemi iba linük anema ola adoka liasü.

Myanmar nung sepaitemi 'Meth' süngjang shibelenba apu

Yangon, May 2 (Agencies): Myanmar kübok Rakhine State nung sepai ketdangser ana den tangar ana ozüng alema shibelenba mozütem bena lia apu, ta police osang ka ajanga metetdaksü.

Bangladesh nung meth tablets (methamphetamine) kanga bulua amshiba ajanga arrtsü adena Myanmar nungi iba mozü shibelener, ta bushisüngdangertemi ashir.

Rakhine kübok Butheedaung township nungi Maungdaw-i aoba lenmang nung nisung pezü checkpoint ka nung apu, ta local border guard police officer kati ashi.

"Hombarne police telok kati Major ka den sepai ka aser Rakhine nung ana ket nung

mozü bena lia apu" ta paisa ashi.

"Mitkar ketdangser aser sepai naji mitkar temzüng kübok ken o benoka angadangts. Iba jagi onoki tena local military command ket nung agütsüögo" ta police ketdangserisa metetdaksü.

Parnok ket nung bena aliba mozü indang jengjangji sen 880 million kyat (\$650,000) shi asütsü, ta paisa shisem.

Maungdaw jila nung Police major Kyaw Mya Win-ia nisungtem apubaji shitak ta ashi saka pai iba dak sendakba osang kecha balaka memetdaksü.

"Border guard police-i Hombarne gari ka nung stimulant tablets 440,000 shi

apu" ta pai ashi.

Alima nung mozü teimba yangluba linükji Myanmar lir aser iba linük nung opium, cannabis aser "yaba" ta ajaba caffeine enoka yangluba methamphetamine pills yanglur.

Yaküm police-i mozü süngjang million 98 tashi apu aser iba ya 2015 küm million 50 apuba nungi anasü shi ka liasü.

Mozü teimbaka China den arrtsü aliba tesemtem nung telungpurtemi yanglur aser Southeast Asia ajanga belenshir.

Myanmar nungi Bangladesh-i Meth tablets shibelenbaji Naf ayong ajanga belener. Iba ayong ya ajanga linük ana arrtsüa lir aser iba tesem nung Rohingya Muslim nungertem alir.



South Korea yimtiba Seoul nung May 9 presidential election atema o atsütepba sentong nung adentsü atema arudang South Korean presidential election candidate tem- (abelen nungi) Democratic Party of Korea nungi Moon Jae-in, Liberty Korea Party nungi Hong Joon-pyo, Bareun Party nungi Yoo Seong-min, Justice Party nungi Sim Sang-jung aser People's Party nungi Ahn Cheol-soo nungertem külemi agiba noksa angur. (Seoul, May 2)

Erdogan-i AKP nung tanaben denogo

Ankara, May 2 ta osangbener kati ashi.

(Agencies): Turkey nung Erdogan-i küm asemshi medeni lir Mongulbarnü Turkish ruling party nung tanaben denogo.

Islamic nung amendaker tentetba Justice and Development Party (AKP) indang membership document ka nung Erdogan-i sign asü,

Iba mapang Erdogan den pa kinungtsü Emine aru aser tena AKP chairman aser Prime Minister Binali Yildirim den külemi amen, ta osangbenerisa shisem.

May 21, 2017 nü AKP congress alidang President Erdogan tanaben party chairman shimtsü akok aser pai Yildirim melenzüksü.

Israel-i tang mezüng atema F-35 tayimtsütem sayu

Tel Aviv, May 2 (Agencies): Israel nung tanü Independence Day benjung amungdang United States nungi alizükba F-35 tayimtsütem tanü mezüng atema alima dang sayuogo.

Tanü Tel Aviv tzüküm anasa Israel indang F-35 tayimtsü pungu rongnungi asem tashi anüng nung yimketa sayu.

F-35 tayimtsütemji US nung amenoka aliba Lockheed Martin ajanga yangluba lir aser Israel nüjiso ngur küm 69 ajungbamung nung F-35 temi tongti shilem agia liasü.

Yaküm December ita US ket nungi Israel-i tayimtsü

punguji mezüng shilem atema alizük. Mepetmesü agi sünga aliba Middle East tesem nung mitkar tashi tuluba asütsü nükjidong nung parnok Israel-i tayimtsütemji alizük.

Israel-i F-35 tayimtsü 50 shi alitsü sentong lir. tanga linüktemia US dang nungi F-35 tayimtsütem alitsü shia lir, saka United States adena orr mezüngbuba F-35 squadron alibaji Israel asütsü.

Küm shia Israel-i USD 3 billion den tema US defence aid angur.

Israel-i mezüng shilem nung USD 110 million (103.5 million euros) shi endoka F-35 tayimtsü 33 alitsü sentong lir.



May 2, 2017 nü Iraq kübok Mosul nung Iraqi Federal Police-i Islamic State kiralongartem den khatepdang agiba noksa ka angur. (Mosul, May 2)

Bangladesh nung 'Bloggers' tepseter ka apu

Dhaka, May 2 (Agencies): Bangladesh nung police-i ozüngi nokdanga aliba Islamist telungpur telok nung IT tanishir ka apu.

Iba telok yagi secular bloggers aser gay rights activists aika tepsetogo.

Police-i apuba nisungji Ashfaqur Rahman ta jangjaogo. Pa ya al Qaeda ajanga ajungmesoba telok-Ansarullah Bangla Team nung IT tekolak liasü, ta Bangladesh counter-terrorism police tanishir, Monirul Islam-i ashi.

Rahman ya Ansarullah Bangla Team nung military operations tanishir den tesentaktep tajung liasü. Tanishisangji taoba army major

Syed Mohammad Ziaul Haque lir aser 2011 küm sorkar atsüngdoktsü merangba nung pa dak tai tongloktsüba sülen pa jena ao, ta Monirul Islam-isa metetdaksü.

Rahman ji university ka nung computer science tezüngdak nung telungpur telok nung aden. Teloki tenük yokba bloggers senzüsensongba pai mita reprang aser parnok indang social media accounts tim mesüi amshi.

February 2015 nungi Bangladesh nung bloggers 5, publisher ka aser gay rights activists ana tepsetba atema ketdangsertemi Ansarullah Bangla Team dak tai tongloktsü.

Mokokchung nung...

(TAPAK 1 NUNGI...)

"Tanü ya asenoki tarutsü atema otsüsütsü yanglur. Naga nunger ajak ya metsü (seed) aser tera (root) ka dang aser sobaliba ka ta onoki amanger, saka tongtepratep junga maliba ajanga tanü asenoki balala amai bilemer", ta pai ashi.

"Meraket linük mesüra nübur ka yangertsü asoshi asenok ka akümtsüla aser kati ka den tajungleni agizüktepsüla", ta ashi. Aji oda, "Moatsü benjong amungba mapang kin ana ajurutepba ya tangar amokbangtsü atema lungjemerba masü saka asen nübur anitsü aser tarutsü asen lima yangerba nung tangar nem yimli agüja meraket linük ka yangertsü asoshi lir", ta paisa shisem.

Asen sobaliba aser benjongbentsü yagi asenok sendaktepdaktsür, aser iba ama sobaliba maparen ajanga Naga loktiji tanaben asentenshidaktsür aser lungjemtsü asoshi tashi itdaktsür, ta paisa ashi.

Angami nunger tanga kin den lembutepa aliba rongnung Ao kin den teimtiba lir, iba jagi asenok sobaliba, yimyayimpong, libaliru, kati ka agizüktepba, jenjii otepba aser tapu aika nung mesüktepba sayur, ta ashi.

'Aorji sempet aser temaotsü aketba kin ka lir, Ao kinji shisashir aser lenir adokdaksüba kin lir', ta ashi. 'Tanü Ao Sendeni achayanga kin ana lungjemdaksüba amai tarutsü nunga tanga kin ajak lungjemdaksütsü imlar', ta paisa shisem.

APO tir Dr. Vilhusa Seley-i Ao Senden nem tetushi agüja Angami nunger jung ka aser rong nület ka ta senpettsü. Tatem nung Aor sobaliba nung aketba ama aksü maparen inyaka iba sentong tobur junga tembang.

Sentong nung Ao Senden tir C. Angang Jamiri tarur ajak pelaa pelaa agizükba den Forest, Environment & CC minister Imkong L Imchen, Addl. Chief Secretary & Finance Commissioner Temjen Toy IAS, CNTC executive G.K Zhimomi, ENPO tatong tir Mongko, Watsü Mungdang tir Moachila nungertemi Moatsü salem lemsatep.

Taoba Ao Senden tir M.B Longkumeri melepzüing o jembu. Iba sentong ABAM executive secretary Rev. Dr. Mar Atsongchangeri temoatsü meshia sarasademer tenzik aser Kumlong Baptist Arogo pastor Rev. Lima Jamir den sarasadema tembang. Tongti tesemdanger Dr. Shurhodelie meina par külem medemertem aser sorkar tular aika aru.

**DIMAPUR AREA CHUCHUYIMLANG RIONGSANGER
7th BUBA SÜNGPO ZÜNGA MOATSÜ MONG**

"MOATSÜ 2017"

✕ Tesentepdak : IMC Hall ✕ Anogo : 4th May ✕ Mapang : 10:00 Am

- ☛ Sentong lenir : Ketdangpurtem
 - ☛ Soyim Ken
 - ☛ Sarasademtsü : Wt.Alemla
 - ☛ Telok Pela agizükba : Tir. 7th Buba süngpo Zünga, Dimapur Unit.
 - ☛ Tajungshi-O : Wb. Bendangyanger (5 Mins)
 - ☛ Amen Ken Ka : 2nd Buba süngpo Zünga, Dimapur Unit.
 - ☛ Azü too ken : 7th Buba süngpo Zünga, Dimapur Unit.
 - ☛ Moatsü ratet : Wb. Alimangyang
 - ☛ Aruju nung Tenung : 7th Buba süngpo Zünga, Ateмба Dimapur Unit.
 - ☛ Melepzüing-O : Wb. Imliakum
 - ☛ Tatem Sarasadem : Telok
- followed by luncheon*
- Temetetsü**
- Iba Moatsü mong nung zünger züngsem ajak aser tsürapur tem ajak arua atentsü pela shishia jaker. Ajaki pel sübotsü subar arutsü metetdaksür. Iba sentong asoshi ajaki sarasadema atati.*

Tepela Lemsateper



08/07/1951

25/04/2017

Onoki kanga dang meima aliba asür LIPOKTEMJEN (Longmisa), shirang yipden nung alidang nungi tasüba anogo tashi shirnokisa nübo, rongsen, shisatsü aser tamang sarasadem agi yaritepogo, nenok ajak dangi tsüngdong marutetaka iba sangdong ajanga tepela lemsateper.

Nenok mapa tajung onoki kodanga mamatetsü, asen Teyanglur Takarsang Tsüngremi nenok ajak talubosa moajangma ta sarasademer.

Temeim Kinungtsü, Chirnur, Semchir, Kinungertem aser Anükapang.

Pelaba Lemsateper



IMTINUNGCHIT JAMIR (Mangmetong)
03/08/1957 - 24/04/2017

Temeim kinungbo, obala aser oboula

Onok azüngmeyak, tejashi aser menungraba agi sünga lir. Kenü dang, ojang ka dang aser ken dang kongshidangnüa, na anojungi iba lima nungi pilaba ya onoki mangatetter, mesüra asenok tepela o mejembijungi na onok nungi kodaser pilaa adok ta bilemer, ajsüüaka meilongi onoki na iba lima nungi pilaba indang dang masü saka na taküm alidang inyakba mapa tajungtem kodanga mamatetsüsa onok mulungjangi arur.

Ozü temeim asür IMTINUNGCHIT JAMIR shiranga alidang aser pa sür onok mangyim jashi nung alidang kinunger adianutem aser medemertem shirnokisa onok mulung sünepja nübo, rongsen, shisatsü aser sarasadem agi yariogo, nenok ajak dang onoki kanga pelaba metetdaksür. Onoki nenok ajak tenüngteta pelaba meshitetaka nenok temeim mapatem onoki teti bilemettsü.

- Temeim kinungtsü, Chirnur, semchir aser kinungertem.

Aitsür

Dimapur Longkong Senso Telongjem (DLST) aser Longkong Senso Mungdang-i (LSM) April 30, 2017 nung Chumukedima Police Gate aser Patkai apu tsüngda, ozü senso tajung asem memetetba nisung kari gari ajanga tsüksetta yutsür ajenbaji kukua aitsür.

Anungji DLST & LSM ajanga ozüng amertem dang tekaraba nung aibelener pua arutsü aser ozüngi melaba ama tapet temerenshi agütsütsü mepishir.

Sd/- **TARENUNGSANG** President
Dimapur Longkong Senso Telongjem

Sd/- **LANUMEREN** President
Longkong Senso Mungdang

Dimapur Chungtia Senso Telongjem

Raffle Draw Result
Draw Date 2nd May 2017

1st -1971 2nd - 0335 3rd - 1000
Consolation Prizes : 1318, 1882, 1775, 1352, 2006, 2501, 0159, 2129, 1400, 2589, 1763, 1948, 0324, 1159, 2457, 1481, 1186, 2252, 1350, 1493.

For further enquiries, please contact 8414045211.

Kilang Ajem,
President, DCST

Nokenwaba,
Secretary, DCST.



Guwahati, May 02, 2017: May 01, 2017 nü CBCNEI Mission Compound, PanBazar, Guwahati nung Ao Senso Telongjem Guwahati 71 buba küm Tatem Senden den külemi Moatsü Mong amungba mapang tangokba noksa nung angur. Iba sentong nung Ao Kaketshir Telongjem Guwahati aser Tsüraburtemi Moatsü ken ka ka aten aser Wb. Aolepshi Jamir ajanga Moatsü ratet shia liasü. Iba sentong ana reptepa kanga takok ngua aser longsutepa mongogo, ta Ao Senso Telongjem Guwahati Tir, Wb. Temsüzulu Walling aser Secretary, Wb. Temjen Longkümer nati tanü sangdong ka nung metetdaksü.

**MOKOKCHUNG NUNG
DOKAN AYOKER**

Tents, Chairs, Flowers, Utensils aser
Wedding nung amshitsü oset balala.

Taliner lira Contact No.

9862140743 / 9862370793

METETDAKTSUR

FORM NO. 6

Company Petition No of 9 of 2016

The official Liquidator attached to the Hon'ble High Court at Gauhati and Liquidator of Metro Radio cabs Limited Vs. Mahesh Gupta & 2 others.

NOTICE OF PETITION

To

Companies Act, 1956 kübok section 468 nung ajemdaker tekalen tenüing agüja aliba telok nung directors/respondents (in liquidation), dang company meyong kaketter aser records, moveable aser immovable rongsen ajak agütsütsü asoshi Hon'ble High Gauhati nung official Liquidator-i 21st. September 2016 metetdaksüba ama kasa ken o ji Company Judge-i angadangtsü asoshi 28th, June, 2017 nung lateta lir. Nai iba petition-ji anema nokdanküra affidavit ka nung kuli tejanga shia notice den külemi agütsütsü. Tsünglanglen sign süa alisangi application copy ka nü dangi yoktsü aser yangji kasa maparen atema sen kwika nüngdaksü, ibaji metetdaksütsü. Iba ken o angadangnü na medentetra, na maliyonga angadangtsü .

Name : Kaushik Goswami

Dated : 03.05.2017

(Advocate for petitioner)

Address : Protech Heritage, Flat 6C

Tower 2, Mother Teresa Road,

(Zoo Narengi Road), Guwahati - 781024, Assam

Throttle Thrust II asayamong osang



Mokokchung, May 2: "Throttle Thrust II" gari asemtepba sentong C. Apok Jamir, Parliamentary Secretary, Tourism, Government of Nagaland-i lapoktsüba mapang tangokba noksa nung angur.

Mokokchung, May 02 (TYO): Spearhead Motorsport Initiative ajanga "Throttle Thrust II" gari asemtepba sentong Mokokchung kübok Longmisa yimtsüing nung aliba Longrangdang tesem nung May

Nagaland, C. Apok Jamir tongti tesemdanger asü.

"Gari asemtepba ya asaya kisüing masü saka iba sentong ajanga medemer timba yimteter aser adventure atema tanüla tuluba kümdaktsür, linük tasen nguteter aser sobaliba, tamangba yimsü balala nungi nisungtem ka küma longjemdaktsür," ta C. Apok Jamir-i iba sentong nung jembidang ashi.

Linük tesem balala nungi iba tetoktepba nung shilem agitsü arur ajunga dang Tongti tesemdangeri pelaba lemsatetep aser kin ajak tsüingda yimjung, tesunep aser tangatetep alitsü ajungshi.

Iba tetoktepba tenzüker tananübüba nung Longmisa yimtsüing indang ground nung Autocross telemsa indang final asayatsü.

Oorja-CAPF U-19 asayamong osang

Kohima, May 02 (TYO): HQ IGAR (N) kübok 9 Assam Rifles ajanga ayongba Nagaland State League "Oorja - Central Armed Police Force (Oorja-CAPF) U-19 football Talent Hunt Tournament anogo ananü buba osang yamai alitsü:

Tetsürtem IG Stadium Kohima nung football asaya aser Girls Sports Hostel, Dimapur-i Govt. High School Khonoma madak 2-0 agi akok. Iba asaya tenzüker minute 28buba nung Watijungla (9)-i goal ka aser minute 57buba nung Seyekhreno (6)-i goal ka agütsütet.

Tanabuba asaya nung Sweet Poison Club, IG Academy aser Christ King HHS, Kohima tsüingda asayaba nung Sweet Poison Club-i goal 8 agüja iba asaya mela mela akok. Iba asaya tenzüker minute asem tsüingda nung Akhala (7)-i goal ka, minute pezübuba nung Neichutou (8)-i goal ka, minute 6 aser 14buba nung Vizovono(15) ana, minute 12buba nung Mhasikhono (17)-i goal ka aser minute 33, 38 aser 40buba nung Agheli (12)-i goal kaka agütsütet.

Tasembuba asaya nung KV

Dimapur aser Bayavu Hill High School, Kohima tsüingda asayaba nung telok katia goal magütsüteti asaya tembang.

Kasa Tournament ya teburtem Local Ground, Kohima nung asaya aser mezüing asaya nung SAI STC Dimapur aser Don Bosco HSS tsüingda asayaba nung SAI STC Dimapur teloki goal 9 agütsütet saka Don Bosco HSS telok nungi goal kata magütsüteti asaya tembang. Iba asaya nung SAI STC Dimapur nungi goal agütsürtem yamai alitsü; Thaihan Difoosa (19)-i goal ka, Nikedozo (9)-i goal pezü, Temsunungsang (7)-i goal ka, Yekivi Swu (10)-i goal ka, Huvesu Tetseo (4)-i goal ka aser Hangoulentuboi (12)-i goal ka agütsü.

Teburtem tanabuba asaya nung State Boys Hostel, Nagaland aser KV Rangapahar tsüingda asaya aser iba asaya tenzüker minute 1:40 nung State Boys Hostel nungi Niuka (17)-i goal ka aser minute 23buba nung goal ka agütsütete. Kasa telok nungi Apongthung (10)-i goal ka aser Chalvin (9)-ia goal ka agütsü saka KV Rangapahar telok nungi goal

kata magütsüteti iba asaya tembang.

Tasembuba asaya nung State Sports Academy-i KV Kohima nem goal 9 agütsüteti iba asaya kanga mela koktet. Iba asaya nung KV Kohima telok nungi asayar katia goal kata magütsütet. State Sports Academy telok nungi goal agütsürtem; Kakhevi (6)-i goal asem, Nighato (3)-i goal ka, Purakam (11)-i goal ana, Kitho (17)-i goal ana aser Vinoka (19)-i goal ka.

May 3 nung asayatsüpurtem yamai alitsü:

- Tetsürettem - IG Stadium:**
1. Young Girls Club vs Gils Sports Hostel, Dimapur @8:30am
 2. Government High School Khonoma vs Kohima Girls Sports Hostel, Dimapur @ 10:30am
 3. KVS Dimapur vs Bayavu Girls HSS Kohima @ 1:30pm
- Teburtem - Local Ground Kohima:**
1. Christ King HSS Kohima vs SAI - STC Dimapur @ 7am
 2. KV Dimapur vs Don Bosco Kohima @ 10am
 3. KV Kohima vs KV Rangapahar @ 1pm

MAY 03, 2018 ASAYA
Kolkata **VS** Pune - 8:00 PM

MAY 2, 2017 ASAYA OSANG
Delhi-i wickets 6 agi Hyderabad akok

Badminton asayamong mapang YNP puri angati medical check-up agütsütsü



Dr priyadarshin



Iba medical check-up ya state nung doctor tajungtem rongnung kar den külemi Miss India Elite aser Super Model of the World 2017 nung India tenüing nung shilem agitsü alila Dr Priyadarshini Borah-i temang reprangba nung shilem agitsü.

Young Naga Professionals ya registered club mesüra society ka masü saka lokti meimba nüburtem adenshia akümba lokti ka lir. Iba telok nung kin, küm aser atsiü apong ajak me yoktepa lir.

Dimapur, May 2 (Agencies): Young Naga Professionals (YNP) ya state nung wadang balala nung inyakerteri adenshia akümba telok ka lir. Parnoki DDBA Indoor Stadium nung 2017 May 4 nungi 5 tashi, 1buba Northeast Masters' (Veteran) Badminton Championship asayaba mapang angati 'medical check-up' agütsütsü.

Iba angati medical check-up ya nüburtem nem temang anema alitsü asoshi tesayuba agütsüba den külemi nüingdakba purtemnem angati mozü agütsütsü asoshi ayongzükba lir.

May 5 nü medical check-up agitsü aliba ya lokti ajungtsü mechi nung achaayanga inyakba maparen ka lir. Parnoki mananei iba asayamong mapang chiyongtsü ayokba den külemi traditional stall ka lapoktsü.

YNP puri maneni Naga nunger ajak dang iba asayamong nung arua shilem agiba den külemi Naga nunger chiyongtsü balala jangratema achitsü aser angati medical cheak-up arua agitsü asoshi ayongzük.

9buba Suncity Club-i sangdonger

Kohima, May 02 (TYO): Nagaland Basketball Association aser Suncity Club Kohima-i ayongba 9buba Open Basketball Tournament jenjang tajungba nung asayatetsü asoshi iba asayamong nung shilem agitsü renemer alir aser tejangrar teloktem senden ka

Suncity Office PMK Building, P. Khel Kohima Village nung 2017 May 7 nü nokingdang 2:00 ako nung amentsü.

Anungji team manager aser coach ajak iba senden nung arua atentsü asoshi Suncity Club Kohima ajanga sangdong ka ajanga metetdaktstüi.

Nagaland nung ITI tasen... (TAPAK 1 NUNGI...)

Tang ITI tasen ana amenoktsü atemaji sen lakh 788.50 lezmüksüogo.

State kübok district ana nung ITIs ana lir (Longleng aser Kiphire). Anungji tamalen ITI tasen ana lezmükja liaka tangbo pezü akumtsü atema benokogo.

ITI tasen amenoktsü atema benokba dak sendakba nung Minister-i, state nung ano ITI tasen ana bendenloktsü atema ministry-i mera agia inyaktsü, ta metetdaktstü.

"Enhancing Skill Development Infrastructure in

NE States & Sikkim" scheme ya 2010 küm February 2010 ita nung sen crore 57.39 intoka tenteta liasü.

Iba mapang nungji ITI 20 up-gradation küboki aitdaktstü aser ITI 28 Supplementing Deficient Infrastructure küboki aitdakja liasü.

2014 küm ITI tasen 14 amenok aser ITI ka amenokba shia sen crore 6.22 intok aser maneni ibaji reprangshia 2015 küm nungbo ITI tasen 22 amenokba nung ITI shia sen crore 9.50 intok.

5 Problems

One Solution

Oajm

FAST RELIEF FROM PAIN

Manufactured by: Himalaya Research Health Products Pvt. Ltd; Thane (Maharashtra), INDIA. CUSTOMER CARE: 022-2793437

BIEMDANGANG

"Temeim ya rara mesüka lir, mela mela tenzüker saka saksaka tembanger."